

A WAKTITOREN

A E TAKI FU YEHOVAH KOWNUKONDRE



STUDIE-ARTIKEL

30 SEPTEMBER–6 OKTOBER

**Gado meki unu
kon santa**

BLADZIJE 3 • SINGI: 125, 66

7-13 OKTOBER

**Noiti yu ati
musu bron
nanga Yehovah**

BLADZIJE 10 • SINGI: 119, 80

14-20 OKTOBER

**Poti prakseri na
makandra èn
gi makandra
deki-ati**

BLADZIJE 18 • SINGI: 124, 20

21-27 OKTOBER

**Sortu sma
yu musu de?**

BLADZIJE 23 • SINGI: 61, 43





PAPUWA NYUN GINEA

KAFTI: Kownukondre preikiman e preiki oso-fu-oso na ini Erap. Disi na wan fu den furu farawe dorpu na ini a bergikontren fu a distrikt Morobe na ini Papuwa Nyun Ginea.

Omeni sma e tan na ini a kondre: **7.013.829**

Preikiman: **3770**

Gemiddeld gewoon pionier: **367**

Bijbelstudenti: **5091**

Sma di kon na a Memrefesa na ini 2012: **28.909**

Den e vertaal den buku fu wi na ini **14 tongo**



Den sma di kon na a Memrefesa ben de siksi tron moro furu leki den preikiman

STUDIE-ARTIKEL

■ Gado meki unu kon santa

Yehovah meki den futuboi fu en kon santa fu di a e meki den du santa diniwroko gi en. Na ini na artikel disi wi o luku fo sani na ini Nehemia kapitel 13 di kan yepi wi fu tan santa sma.

■ Noiti yu ati musu bron nanga Yehovah

Na ini na artikel disi wi o luku feifi sani di kan meki taki wan Kresten „ati e bron srefisrefi nanga Yehovah” (Odo 19:3). Dan wi o luku feifi sani di kan yepi wi fu no kisi a denki srefi taki na Yehovah e meki wi kisi problema.

■ Poti prakseri na makandra èn gi makandra deki-ati

■ Sortu sma yu musu de?

A fosiwan fu den artikel disi e sori fa wi kan yepi makandra fu tan dini Yehovah fayafaya awinsi wi abi problema. A di fu tu artikel e sori fa wi kan wai pasi gi den triki fu Satan di wani pori a matifasi fu wi nanga Gado.

TRA ARTIKEL NA INI A WAKTITOREN DISI

8 Aksi fu leisiman

9 Yehovah 'e tyari a lai fu mi ala dei'

15 Papa nanga mama—Bigin gi yu pikin leri yonguyongu kaba

28 Elisa ben si fetiwagi di abi faya—Yu e si den tu?

31 A historia fu wi



GADO MEKI UNU KON SANTA

„Gado wasi unu kon krin, a meki unu kon santa.”

—1 KOR. 6:11.

SAN YU BEN O PIKI?

Fu san ede wi musu luku bun na nga takru mati?

Fa wi kan horibaka gi den seti fu Gado?

San o yepi wi fu poti na anbegi fu wi na a fosi presi na ini wi libi? San o yepi wi fu tan tyari wisrefi leki trutru Kresten?

DI NEHEMIA kon na Yerusalem wan pisi ten baka a yari 443 Fosi Krestes, a yere taki wan tu sani ben e pasa di no ben moi srefisrefi. Wan ogri-ati man fu wan tra kondre ben e tan na ini wan fu den kamra fu a tempel. Den Leifisma ben tapu nanga a wroko fu den èn na presi taki den owru man ben e teki fesi na ini a tru anbegi, den ben e du bisnis na tapu Sabat-dei. Furu Israelsma ben e trow nanga sma di no de Dyu. Ala den sani disi ben e gi Nehemia broko-edede.—Neh. 13:6.

² Israel ben de wan pipel di ben gi densrefi abra na Gado. Na ini a yari 1513 Fosi Krestes, den Israelsma ben de klariklari fu du a wani fu Yehovah. Den ben taki: „Wi o du ala san Yehovah taki” (Eks. 24:3). Dati meki Gado meki den kon santa, sobun a meki den tron a spesrutu pipel fu en. Dati ben de wan bigi grani! Fotenti yari baka dati, Moses memre den: „Yehovah un Gado e si unu leki wan santa pipel. Na unu Yehovah un Gado teki fu tron en pipel. Fu ala tra pipel na grontapu, na unu a teki leki wan spesrutu gudu.”—Deut. 7:6.

³ Ma syatu baka di den Israelsma tron a pipel fu Gado, den no ben si en leki wan bigi grani moro fu de wan santa pipel. A tru taki ala ten wan tu Dyu ben e dini Gado nanga den heri ati. Ma furu fu den Dyu ben e du nomo leki den santa èn den ben e du leki den e dini Gado fayafaya. Den no ben e broko den ede tumusi nanga a wani fu Gado. Pikinmoro wan hondro yari na fesi, wan tu Dyu ben komoto na ini katibo na Babilon fu seti a tru anbegi baka. Ma di Nehemia go na Yerusalem a di fu tu leisi, a pipel no ben e dini Gado so fayafaya moro.

⁴ Neleki den Israelsma fu owruten, na so Gado meki Yehovah Kotoigi tron en santa pipel na ini a ten disi.

-
1. Sortu sani ben e pasa na a ten di Nehemia drai go baka na Yerusalem? (Luku a prenki na a begin fu na artikel.)
 2. Fa Israel tron wan santa pipel?
 3. Fa den Dyu ben e si na anbegi fu Gado di Nehemia go na Yerusalem a di fu tu leisi?
 4. Sortu sani wi o luku di kan yepi wi fu tan wan santa pipel?

Den salfu Kresten nanga den sma fu a „bigi ipi” de santa èn den e dini Yehovah wawan (Openb. 7:9, 14, 15; 1 Kor. 6:11). Nowan fu wi ben sa wani du wan sani di kan meki taki Gado no e si wi leki santa sma moro. Na dati pasa te fu kaba nanga den Israelsma. Fa wi kan sorgu taki disi no pasa nanga wi? Fa wi kan tan santa sma di Yehovah kan gebroiki fu du a wani fu en? Na ini a studie-artikel disi wi o luku fo sani di e kon na krin na ini Nehemia kapitel 13: (1) Luku bun nanga takru mati. (2) Horibaka gi den seti fu Gado. (3) Poti na anbegi fu Gado na a fosi presi na ini yu libi. (4) Tan tyari yusrefi leki wan trutru Kresten. Meki wi poti prakseri now na ibriwan fu den sani disi.

LUKU BUN NANGA TAKRU MATI

⁵ *Leisi Nehemia 13:4-9.* Furu sani de di kan meki wi du sani di no fiti èn dati meki a no makriki fu tan santa. Meki wi luku a tori fu Eliasib nanga Tobia. Eliasib ben de granpriester. Soleki fa a sori, Tobia ben de wan Amonsma di ben e libi na ini Yudea èn di ben de wan lantiman fu Persia. Di Nehemia ben wani bow a skotu fu Yerusalem baka, Tobia nanga den mati fu en ben e gens en (Neh. 2:10). Amonsma no ben mag kon na ini a tempel-dyari (Deut. 23:3). Sobun, fu san ede a granpriester gi wan man leki Tobia wan nyanyan-kamra na ini a tempel?

⁶ Tobia ben tron wan bun mati fu Eliasib. Tobia nanga en manpikin Yohanan ben trow nanga Dyu uma èn furu fu den Dyu ben lobi Tobia (Neh. 6:17-19). Wan granpikin fu Eliasib ben trow nanga na umapikin fu Sanbalat. Sanbalat ben de a granman fu Samaria èn wan fu den moro bun mati fu Tobia (Neh. 13:28). Kande na den sani disi meki taki Granpriester Eliasib gi pasi taki Tobia ben abi krakti na en tapu, aladi Tobia ben de wan gensman èn a no ben e anbegi Yehovah. Ma ala den sani di Tobia ben abi na ini

a nyanyan-kamra Nehemia trowe go na dorosei. Na so Nehemia sori taki a ben e horibaka fayafaya gi den seti fu Yehovah.

⁷ Fu di wi leki Kresten gi wisrefi abra na Gado, meki Yehovah na a moro prenspari sma gi wi. Efu wi no e gi yesi na den wèt fu en, dan a no o si wi leki en santa pipel moro. Wi no musu meki wi famiri de moro prenspari leki na anbegi fu wi. Kresten owruman e du sani soleki fa Yehovah wani. Den no musu du sani soleki fa densrefi e denki noso e firi (1 Tim. 5:21). Den owruman e luku bun taki den no du wan sani di kan meki taki Gado no feni den bun moro. —1 Tim. 2:8.

⁸ Wi no musu frigiti taki „takru kompe e pori bun gwentu” (1 Kor. 15:33). A kan taki son famiri fu wi e meki taki wi go du sani di no bun. Di Nehemia ben e bow den skotu fu Yerusalem baka, dan Eliasib ben e horibaka gi en nanga en heri ati. Sobun, a ben de wan bun eksemple gi a pipel (Neh. 3:1). Ma bakaten Yehovah no ben e si en leki wan santa sma moro fu di a gi pasi taki Tobia nanga tra sma meki a du sani di no bun. Bun mati e gi wi deki-ati fu du den sani di Kresten musu du. Den e gi wi deki-ati fu leisi Bijbel, fu go na den Kresten konmakandra èn fu go na ini a preikiwroko. Wi breiti te wi abi famiri di e gi wi deki-ati fu du san bun èn wi lobi den trutru.

HORIBAKA GI DEN SETI FU GADO

⁹ *Leisi Nehemia 13:10-13.* Na a ten di Nehemia drai go baka na Yerusalem, a sori leki a pipel no ben e tyari a di fu tin pisi fu den sani fu den moro fu horibaka gi a wroko na ini a tempel. Fu di den Leifisma no ben e kisi yepi moro, meki den libi den wroko

7. Fa owruman nanga tra Kresten kan sorgu taki Yehovah tan si den leki santa sma?

8. San ala futuboi fu Yehovah musu hori na prakseri te a abi fu du nanga mati?

9. Fu san ede son seti na ini a tempel no ben e waka bun èn suma Nehemia ben gi a fowtu?

5, 6. Suma ben de Eliasib nanga Tobia? Fu san ede Eliasib ben e bumui nanga Tobia?

èn den go wroko na ini den gron fu den. Den ondro-granman ben abi a frantwortu fu teki den sani na a pipel èn fu tyari dati go na a tempel. Ma soleki fa a sori, dan den no ben e teki den sani na a pipel, noso den no ben e tyari den sani dati go na a tempel (Neh. 12:44). Dati meki Nehemia seti sani, so taki den Leifisma ben kan kisi den sani disi baka. A poti man di a ben kan frutrow fu luku den maksin èn fu sorgu taki den Leifisma kisi san den ben musu kisi.

¹⁰ Wi kan leri wan sani fu a tori disi? Iya. A tori disi e memre wi taki wi abi a grani fu dini Yehovah nanga den sani di wi abi (Odo 3:9). Te wi e gi moni fu horibaka gi a wroko fu en, dan yu kan taki dati na gi wi e gi Yehovah san de fu en kaba (1 Kron. 29:14-16). Awinsi wi no abi furu, toku wi no musu denki taki wi no man horibaka gi a wroko. A no abi trobi o furu wi e gi, ma solanga wi e du dati nanga wi heri ati, Yehovah e warideri dati.—2 Kor. 8:12.

¹¹ Furu yari langa wan bigi osofamiri ben meki wan owru trowpaar di ben de spesru-tu pionier, kon nyan nanga den wán dei na ini a wiki. Na ini a famiri disi yu ben abi aiti pikin, ma a mama ben e taki ala ten: „Wi de nanga tin sma kaba. A no abi trobi efu ete tu sma kon nyan.” Kande a no gersi wan kefa-lek sani fu gi sma nyanyan wán dei na ini a wiki, ma toku a pionier trowpaar ben de nanga tangi taki na osofamiri sori switifasi gi den. A pionier trowpaar disi ben de wan ble-si gi na osofamiri. A deki-ati di den gi den èn den ondrofenitori fu den yepi den pikin fu go na fesi na ini na anbegi. Bakaten den alama go na ini a furuten diniwroko.

¹² Wan tra sani di wi kan leri fu Nehemia, na disi: Owruman nanga dinari ini a diniwroko musu de bun eksemple na ini na anbegi. Na so den kan yepi den brada nanga

10, 11. Sortu grani a pipel fu Gado abi?

12. Sortu bun eksemple den man di abi frantwor-tu na ini a gemeente e gi?



Fa Nehemia sori taki a ben wani gi yesi na Yehovah ala ten? (Luku paragraaf 5, 6)

sis a na ini a gemeente. Na apostel Paulus ben de wan bun eksemple gi a gemeente. A ben e horibaka gi a tru anbegi èn a ben e gi den gemeente bun rai. Fu eksemple, a ben sori wan gemeente fa den kan gi moni fu horibaka gi na anbegi.—1 Kor. 16:1-3; 2 Kor. 9: 5-7.

POTI NA ANBEGI FU GADO NA A FOSI PRESI NA INI YU LIBI

¹³ *Leisi Nehemia 13:15-21.* Efu wi e bigin poti tumusi furu prakseri na gudu, dan te fu kaba wi no o poti na anbegi fu wi na a fosi presi na ini wi libi moro. Eksodes 31:13 e sori taki a Sabat di den Israelsma ben musu

13. San son Dyu ben e du na tapu Sabat-dei?

hori ibri wiki, ben musu memre den taki den na wan santa pipel. Na tapu a Sabat-dei den osofamiri ben musu poti prakseri na a anbegi fu den, den ben musu begi, èn den ben musu teki ten fu prakseri fu Gado Wèt. Ma son sma na ini a ten fu Nehemia begin si a Sabat-dei leki iniwan tra dei. Den ben e du bisnis soleki fa den ben gwentu du na tapu tra dei. Na anbegi no ben de so prenspari moro gi den. Di Nehemia si san den sma ben e du, a meki den tapu den portu fu a foto na a mofoneti fu a di fu siksi dei. Boiti dati, a yagi den bisnisman di ben komoto fu tra kondre, fosi Sabat-dei bigin.

¹⁴ San wi kan leri fu na eksemple fu Nehemia? Wi musu luku bun taki a wroko noso a bisnis fu wi no de a moro prenspari sani na ini wi libi. Disi kan de wan trutru tesi gi wi, spesrutu efu wi lobi a wroko fu wi. Memre taki Yesus ben warskow wi taki wi no kan dini tu masra leki srafu. (*Leisi Mateyus 6:24.*) Nehemia ben kan meki furu moni di a ben de na ini Yerusalem. Ma fa a ben gebroiki en ten di a ben de drape? (Neh. 5:14-18) A no ben e suku fu du bisnis nanga den sma fu Tirus noso sma fu tra kondre. Na presi fu dati, a ben gebroiki en ten fu yepi den kondreman fu en èn fu du sani di ben meki Yehovah nen santa. Na ini a ten disi, Kresten owruman nanga dinari ini a diniwroko e gebroiki den ten tu fu yepi a gemeente. Dati meki den brada nanga sisa fu den lobi den. Disi e meki taki a pipel fu Gado abi lobi, den abi freide, èn den no e frede.—Esek. 34:25, 28.

¹⁵ Kresten no abi fu hori Sabat, ma toku Paulus taki dati „a pipel fu Gado o feni rostu ete, neleki fa sma ben e rostu na tapu a Sabat-dei”. A taki tu: „A sma di e rostu leki Gado, e rostu sosrefi fu en eigi wroko, neleki fa Gado e rostu fu en eigi wroko” (Hebr. 4:9, 10). Leki Kresten wi kan rostu leki Gado

te wi e gi yesi na en èn te wi e wroko makandra nanga en fu meki a wani fu en kontru. A de so taki yu nanga yu osofamiri e poti na Osofamiri Anbegi, den konmakandra, nanga a preikiwroko na a fosi presi na ini un libi? Kande wi basi noso den sma di e du bisnis nanga wi e si na anbegi fu wi leki wan lawlaw sani. Efu disi de so, dan wi o abi fu taigi den krin taki na anbegi fu wi na a moro prenspari sani na ini wi libi. Fu man poti a tru anbegi na a fosi presi, Nehemia ben ‘tapu den portu fu Yerusalem èn a ben yagi den Tirus-sma gowe’. Kande wi abi fu du wan srefi sortu sani tu fu man poti wi anbegi na a fosi presi èn fu man poti ala prakseri na a diniwroko fu wi. Fu di Gado meki wi tron wan santa pipel, meki a bun fu aksi wisrefi a sani disi: ‘A fasi fa mi e libi e sori taki mi e poti na anbegi fu Yehovah na a fosi presi?’—Mat. 6:33.

TAN TYARI YUSREFI LEKI WAN TRUTRU KRESTEN

¹⁶ *Leisi Nehemia 13:23-27.* Na ini a ten fu Nehemia, den man fu Israel ben e trow nanga uma fu tra kondre. A fosi leisi di Nehemia go na Yerusalem a meki den owru man meki wan kruderi èn a meki den skrifti na tapu papira taki den man fu Israel no o trow nanga trakondre sma (Neh. 9:38; 10:30). Ma baka wan tu yari a si taki toku den Dyu disi ben trow nanga uma fu tra kondre èn den no ben e tyari densrefi leki a santa pipel fu Gado moro. Den pikin fu den trakondre uma disi no ben e leisi noso taki Hebrewtongo srefi. Sobun, te den pikin disi ben kon moro bigi, yu denki taki den ben o kari densrefi Israelsma? Noso den ben o si densrefi leki Asdodsma, Amonsma, noso Moabsma? Efu den no ben sabi Hebrewtongo, dan fa den ben o man frustan Gado Wèt? Fa den ben o leri sabi Yehovah? Yu denki taki den

14, 15. (a) San kan pasa efu wi e gi pasi taki a wroko fu wi tron a moro prenspari sani na ini wi libi? (b) Fa wi kan rostu leki Gado?

16. Sortu sani na ini a ten fu Nehemia ben kan meki taki den Israelsma no ben o de a santa pipel fu Gado moro?

ben o bosroiti fu dini Yehovah na presi fu den falsi gado di den mama fu den ben e an-begi? Den Israelsma ben musu tyari kenki kon wantewante èn Nehemia sorgu taki disi pasa.—Neh. 13:28.

¹⁷ Na ini a ten disi wi musu yepi den pikin fu wi fu tyari densrefi leki trutru Kresten ala ten. Papa nanga mama, aksi unsrefi: 'O bun den pikin fu mi sabi a „soifri tongo” noso den leri fu Bijbel? (Sef. 3:9) Den sani di mi pikin e taki e sori taki a yeye fu Gado abi krakti na en tapu noso a yeye fu grontapu?' No lasi-ati te yu si taki den pikin fu yu musu tyari wan tu kenki kon ete. A e teki ten fu leri wan tongo, spesrutu te wan lo sani de na wi lontu di kan puru wi prakseri. Yu pikin e kisi furu tesi fu du sani di no bun. Fu dati ede, abi pasensi èn gebroiki na Osofamiri Anbegi nanga tra okasi fu yepi yu pikin fu tron wan bun mati fu Yehovah (Deut. 6:6-9). Sori den krin fu san ede a bun fu no de leki den sma fu a grontapu fu Satan (Yoh. 17:15-17). Du mui fu doro den ati.

¹⁸ Bakaten ibri pikin o teki en eigi bosroiti efu a wani dini Gado. Ma papa nanga mama kan du furu fu yepi den nanga a tori disi. A fasi fa den e tyari densrefi kan de wan bun eksemple gi den pikin. Den musu sori den pikin krin tu san den no musu du èn den musu sori den pikin den bakapisi fu den bosroiti di den e teki. Papa nanga mama, unu na den moro bun sma di kan yepi un pikin fu gi densrefi abra na Yehovah. Den abi a yepi fu unu fanowdu fu kan tyari densrefi leki trutru Kresten èn fu kan du dati ala ten. A no de fu taki dati wi alamala musu luku bun taki wi no lasi den agersi „krosi” fu wi. Sobun, wi musu tan meki mui fu abi den fasi fu Krestes èn wi musu tan gi yesi na den leri fu en.—Openb. 3:4, 5; 16:15.

17. Fa papa nanga mama kan yepi den pikin fu tron mati fu Yehovah?

18. Fu san ede Kresten papa nanga mama na den moro bun sma di kan yepi den pikin fu gi densrefi abra na Yehovah?



Yepi yu pikin fu tron bun mati fu Yehovah
(Luku paragraaf 17, 18)

YEHOVAH E 'MEMRE DEN BUN SANI DI WI DU'

¹⁹ Wan fu den sma di ben e libi na ini a ten fu Nehemia, ben de a profeti Maleaki. A ben taki dati „Yehovah gi a komando fu skrifi wan buku fu memre den wan di abi lespeki gi en èn di e hori en nen na prakseri” (Mal. 3:16, 17). Noiti Gado o frigiti den wan di abi bigi lespeki gi en èn di lobi en nen.—Hebr. 6:10.

²⁰ Nehemia ben begi: „Ke mi Gado, memre mi. Memre den bun sani di mi du” (Neh. 13:31). Neleki Nehemia, wi nen kan skrifi tu na ini a buku fu Gado. A no o frigiti wi te wi e wai pasi gi takru mati, te wi e horibaka gi den seti fu en, te wi e poti na anbegi fu en na a fosi presi na ini wi libi, èn te wi e tyari wisrefi leki trutru Kresten ala ten. Meki wi 'tan ondrosuku efu wi de na bribi' (2 Kor. 13:5). Efu wi tan tyari wisrefi leki a santa pipel fu Yehovah, dan a o memre „den bun sani” di wi du.

19, 20. Fa wi kan sorgu taki Yehovah e memre „den bun sani” di wi du?

A fiti taki Kresten papa nanga mama e sidon na den gemeente konmakandra nanga wan pikin fu den di puru fu a gemeente?

■ Te wan sma puru fu a gemeente èn a e kon na ini a Kownukondre zaal, dan wi no abi fu broko wi ede tumusi nanga a presi pe a e go sidon. Son Kresten papa nanga mama abi pikin di puru fu a gemeente èn di e libi ete na ini den oso. Na ini den *Waktitoren* den Kresten papa nanga mama disi kisi furu deki-ati fu tan studeri Bijbel nanga a pikin fu den di puru fu a gemeente, efu dati fiti. Na ini *A Waktitoren* fu 1 oktober 2001, bladzijde 16-18 wi ben gi wan tu rai di abi fu du nanga Kresten papa nanga mama di abi wan pikin na ini oso di puru fu a gemeente. A tijdschrift dati ben sori taki papa nanga mama kan studeri Bijbel srefi nanga so wan pikin di no de wan bigisma ete. Wi e howpu taki disi sa yepi a pikin fu kenki en libi.

Te wan pikin puru fu a gemeente, dan a no de wan problema efu a e sidon pî nanga en papa nanga mama na ini a Kownukondre zaal. A no de wan wèt taki wan sma di puru fu a gemeente musu sidon na bakasei fu a zaal. Sobun, a pikin kan sidon nanga en papa noso mama, awinsi pe den e sidon. Fu di a papa nanga mama abi a frantwor-tu fu gi a pikin leri fu Gado, meki den musu sorgu taki a e poti prakseri na den konmakandra. Fu dati ede a ben o moro bun kande efu a pikin e sidon nanga den, na presi fu sidon en wawan na wan tra presi.

Ma fa a de te a pikin di puru fu a gemeente, no e tan nanga en papa nanga mama moro? A kan sidon ete na sei en papa nanga mama na ini a zaal? Na ini a ten di pasa, *A Waktitoren* sori krin san na a yoisti fasi fa wan Kresten musu libi nanga wan famiri fu en di puru fu a gemeente èn di no e tan nanga den moro.* Ma te wan sma e sidon pî na sei en famiri aladi a puru fu a gemeente, dan disi no de a srefi leki te en famiri ben o suku okasi fu bumui nanga en aladi dati no de fanowdu. Efu den famiri di de Kotoigi abi a yoisti denki fu a sma di puru fu a gemeente èn den e meki mui fu no bumui nanga en soleki fa Bijbel taki, dan nowan sma abi fu broko den ede nanga a tori disi.—1 Kor. 5:11, 13; 2 Yoh. 11.

Sobun, a no abi trobi efu wan sma di puru fu a gemeente e sidon na sei wan famiri noso na sei wan tra sma na ini a Kownukondre zaal, solanga a e tyari ensrefi na wan fasi di fiti. Na ini son situwâsi problema kan opo kon te den e sori so wan sma taki a no musu sidon na son presi. Efu ala sma na ini a zaal, srefi den famiri fu a sma, e du san Bijbel e taki fu sma di puru fu a gemeente, èn disi no e trobi a konsensi fu den brada nanga sisa, dan wi no abi fu broko wi ede tumusi nanga pe son sma e sidon na den gemeente konmakandra.

* Luku a buku *Meki Gado tan lobi yu*, bladzijde 237-239.

Di mi gebore na ini 1956, mi ben abi wan siki na den senwetitei fu mi bakabonyo. Dati meki mi no ben man waka bun èn mi ben kisi tra siki tu.

Wan pisi ten fosi mi gebore, wan trowpaar di ben de zendeling fu Yehovah Kotoigi bigin studeri Bijbel nanga mi papa nanga mi mama. Di mi ben pikin wi ben e libi na ini a foto Usakos na Namibia. Na a ten dati wan tu preikiman nomo ben de drape èn den ben e tan farawe. Wan gemeente no ben de na ini a birti, ma toku na osofamiri fu wi ben gwen-ti luku den sani gi den gemeente konmakandra. Di mi ben abi seibi yari mi ben musu du wan oparâsi. Datra ben musu meki wan olo na mi skin so taki mi ben kan pisi. Di mi ben abi 14 yari mi kisi fadonsiki. Mi no ben man teki furu skoroleri fu di heiskoro ben de farawe èn mi papa nanga mi mama ben musu de nanga mi ala ten fu di mi ben e siki.

Aladi mi ben abi someni problema, toku mi bosroiti fu tron wan moro bun mati fu Yehovah. Furu fu den buku fu na organisâsi fu wi no ben de na ini Afrikaans, a tongo di mi ben gwen-ti taki. Dati meki mi leri Ingrisitongo so taki mi ben kan studeri moro fu den buku fu wi. Bakaten mi tron wan Kownukondre preikiman èn mi dopu di mi ben abi 19 yari. Na ini den fo yari baka dati mi ben e siki furu èn mi ben e firi brokosaka furu tron. Na ini a foto pe mi ben e tan ala sma ben sabi makandra. Dati meki mi ben e frede fu du a preikiwroko fayafaya.

Di mi ben abi sowan 20 yari wi froisi fu Namibia go na Zuid-Afrika. Now fosi mi ben man go na wan gemeente. Mi ben prisiri trutru! Ma mi ben musu du wan oparâsi baka. Disi leisi datra ben musu meki wan olo na mi skin so taki mi ben kan pupe.

Wan leisi di a kring-opziener kon a ben taki fu a pionierwroko. Den sani di a taki naki mi ati trutru. Mi sabi taki a ben o muilek gi mi fu pionier fu di mi ben e siki. Ma mi si fa Yehovah yepi mi nanga ala den furu problema di mi ben abi. Sobun, mi gi mi nen fu tron wan gewoon pionier. Ma fu di mi ben e siki so furu, meki den owruman ben e tweifri efu mi ben o man du dati.

Toku mi bosroiti fu du ala san mi man na ini a preikiwroko. Fu di mi mama nanga tra sma yepi mi, meki siksi mun langa mi ben man doro den yuru fu wan gewoon pionier. Na so mi sori krin taki mi ben wani pionier trutru èn taki mi ben kan du dati aladi mi e siki. Di mi aksi baka fu tron wan pionier, den owruman agri èn na so mi tron gewoon pionier na tapu 1 september 1988.

Leki pionier mi si fa Yehovah horibaka gi mi ala ten. Na presi fu poti tumusi furu prakseri na a situwâsi fu mi, mi e yepi sma kon sabi den tru leri fu Bijbel. Disi yepi mi fu no firi brokosaka so furu moro èn mi kon tron wan moro bun mati fu Yehovah tu. Mi breiti taki mi ben man yepi wan tu sma fu gi densrefi abra na Yehovah èn fu teki dopu.

Mi no sabi fa sani o go nanga mi na ini a ten di e kon. Ma Yehovah 'e tyari a lai fu mi ala dei' (Ps. 68:19). A no e yepi mi nomo nanga a siki fu mi, ma a e yepi mi tu fu abi prisiri na ini a libi!



Maretha du Raan

Yehovah 'e tyari a lai fu mi ala dei'

Mi siki furu tron èn a gersi leki mi no ben o man tyari en. Ma toku mi si taki wi lobi-ati hemel Tata lobi mi èn a horibaka gi mi ala ten. Moro leki 20 yari mi dini Yehovah leki wan pionier èn disi gi mi furu prisiri.



NOITI YU ATI MUSU BRON NANGA YEHOVAH

*„Na a don fu libisma
meki taki den e
pori den libi, ma
toku den ati e
bron srefisrefi
nanga Yehovah.”*

—ODO 19:3.

SAN YU BEN O PIKI?

Fu san ede son sma „ati e bron
srefisrefi nanga Yehovah”?

San na feifi sani di kan yepi wi
so taki wi ati no bron na tapu
Yehovah?

San wi musu hori na prakseri te
wi abi bigi problema?

KON meki wi taki dati yu na wan man di abi wan kolo-
loku trowlibi furu yari kaba. Ma te yu kon na oso wan
dei, yu e si taki ala sani na ini na oso drai tapu. Den
sturu nanga den tafra broko, den grasi sani naki pa-
nya, èn ala den garden priti. Sobun, ala den moi sani
fu yu pori. A no de fu taki dati yu ben o skreki. Wan-
tewante yu ben o aksi: „**Suma** du a sani disi?” Noiti
yu ben o taki: „Fu san ede mi wefi du a sani disi?”, fu
di yu sabi taki yu lobi wefi no ben o du so wan ogri-
ati sani noiti.

² Na ini a ten disi wi e si ala sortu ogri sani e pasa
na grontapu. Sma e doti a grontapu, den e du ala
sortu ogri èn hurudu lai. Fu di wi e studeri Bijbel,
meki wi sabi taki a no Yehovah e meki den sani disi
pasa. Di a meki grontapu a ben wani taki a ben musu
de wan moi paradijs (Gen. 2:8, 15). Yehovah na wan
Gado fu lobi (1 Yoh. 4:8). Fu di wi e studeri Bijbel,
meki wi sabi suma na a sma di e meki taki furu pro-
blema de na grontapu. A sma dati na Satan Didibri,
„a tiriman fu grontapu”.—Yoh. 14:30; 2 Kor. 4:4.

³ Ma wi no kan taki dati Satan e tyari ala problema
kon. Fu san ede? Fu di son leisi na wi srefi e du sani
di e tyari problema kon. (***Leisi Deuteronomium 32:
4-6.***) Aladi wi sabi taki disi de so, toku wi kan bigin
denki tra fasi fu den problema fu wi èn dati kan tyari
takru bakapisi kon (Odo 14:12). Fa so? Na presi fu
denki taki na Satan noso wi srefi tyari a problema
kon, wi kan bigin denki taki na Yehovah du dati. A
kan pasa srefi taki wi 'ati bigin bron srefisrefi nanga
Yehovah'.—Odo 19:3.

1, 2. Fu san ede wi no musu taki dati na Yehovah meki so furu
problema de na grontapu? Fruteri wan agersitori fu tyari disi
kon na krin.

3. Sortu fowtu denki wi kan abi fu den problema fu wi?

⁴ A de so trutru taki wan sma 'ati kan bron srefisrefi nanga Yehovah'? Iya, ma na fu soso a ben o du dati (Yes. 41:11). A no ben o tyari nowan wini kon gi en. Wan puwema skrifiman taki: „Yu anu syatu tumusi fu naki kofu nanga Gado.” Odo 19:3 e taki: „Na a don fu libisma meki taki den e pori den libi, ma toku den ati e bron srefisrefi nanga Yehovah.” A kan taki wan sma no e taki nanga mofo taki en ati e bron nanga Yehovah, ma kande **na ini en ati** a e denki so. Iya, a kan pasa srefi taki a hori Yehovah na ati. Nofo tron disi de fu si na ini den sani di a e du. Fu eksemple, so wan sma no o dini Yehovah so fayafaya moro, noso a no o horibaka gi a gemeente moro.

⁵ San kan meki taki wan sma 'ati bron srefisrefi nanga Yehovah'? San wi kan du so taki disi no pasa nanga wi? A prenspari fu sabi den piki na tapu den aksi disi, fu di dati o yepi wi fu tan mati fu Yehovah!

SAN KAN MEKI TAKI WAN SMA 'ATI BRON SREFISREFI NANGA YEHOVAH'?

⁶ San kan meki taki wan fayafaya anbegiman fu Yehovah bigin krutu en? Meki wi luku feifi sani di kan meki taki disi pasa. Wi o luku wan tu Bijbel eksemple tu di e sori fa a sani disi pasa nanga son sma. —1 Kor. 10:11, 12.

⁷ **Te sma e krutukrutu fu son sani, dan dati kan abi krakti na yu tapu.** (*Leisi Deuteronomium 1:26-28.*) Prakseri san Yehovah du fu puru den Israelsma na ini kati-bo na Egepte. A tyari tin rampu kon na tapu Egepte èn a kiri Farao nanga en legre na ini a Redi Se. Na so den Israelsma ben kon fri (Eks. 12:29-32, 51; 14:29-31; Ps.

136:15). Ma di a pipel fu Gado ben de fu go na ini a Pramisi Kondre, den bigin taki wan lo ogri fu Yehovah. Fu san ede den no ben abi bribi moro? Tin fu den man di ben go luku a kondre, ben taki wan lo takru sani fu a kondre èn disi meki a pipel frede èn lasi-ati (Num. 14:1-4). San ben de a bakapisi? Bun furu fu den Israelsma no go na ini a „moi kondre” dati (Deut. 1:34, 35). San wi kan leri? Te sma e krutukrutu fu son sani, dan dati kan swaki a bribi fu wi èn a kan meki taki wi srefi bigin krutukrutu fu a fasi fa Yehovah e tiri en pipel.

⁸ **Problema nanga broko-edede kan meki wi lasi-ati.** (*Leisi Yesaya 8:21, 22.*) Na ini a ten fu Yesaya, a pipel fu Yuda ben abi bigi problema. Feanti ben lontu den. Den no ben abi nyanyan èn furu sma ben de nanga angri. San ben moro ogri, na taki den no ben de mati fu Yehovah moro fu di den ben e trangayesi en (Amos 8:11). Na presi fu suku yepi na Yehovah, den bigin „fluku a kownu nanga a Gado fu den”. Iya, den ben feni taki na Yehovah meki den kisi problema. Efu problema e meki wi lasi-ati, dan a kan taki wi srefi bigin denki: ‘Te Yehovah ben de di mi ben abi en fanowdu?’

⁹ **Son leisi wi no sabi a fini fu wan tori.** Fu di den Israelsma na ini a ten fu Esekìl no ben sabi krin fu san ede son sani ben e pasa, meki den ben feni taki „Yehovah no e du sani na wan reti fasi” (Esek. 18:29). Den ben e du neleki den ben abi a reti fu krutu Gado. Den ben feni taki Yehovah no e du bun, aladi den no ben sabi krin fu san ede a ben e du son sani. Disi kan pasa nanga wi tu. Efu wi no e frustan

4, 5. A de so trutru taki wan sma 'ati kan bron srefisrefi nanga Yehovah'?

6, 7. Fu san ede den Israelsma na ini a ten fu Moses bigin taki ogri fu Yehovah?

8. Fu san ede den sma fu Yuda bigin fluku Yehovah?

9. Fu san ede den Israelsma na ini a ten fu Esekìl ben feni taki Yehovah no e du sani na wan reti fasi?



Te sma e krutu fu son sani, dan dati kan abi krakti na yu tapu
(Luku paragraaf 7)

wan Bijbel tori krin noso efu wi no sabi fu san ede son sani e pasa nanga wi, dan wi srefi kan bigin denki na ini wi ati taki „Yehovah no e du sani na wan reti fasi”.—Yob 35:2.

10 Te wi sondu noso te wi meki wan fowtu, dan wi kan feni taki na Gado meki wi du en. A fosi man Adam ben feni taki na Gado meki taki a sondu (Gen. 3:12). Adam ben sabi heri bun taki a pasa a wèt fu Gado èn a ben sabi taki a ben o kisi strafu efu a ben sondu. Toku a ben feni taki na Yehovah meki taki a sondu fu di a ben gi en wan wefi di no bun. Sensi a ten dati tra sma bigin du a srefi sani tu. Te den e meki fowtu, dan den feni taki na Gado meki den du dati. Dati meki a bun fu aksi wisrefi: “Te mi meki wan fowtu, mi e sari noso bruya so te, taki mi e bigin denki taki na Yehovah meki mi du dati?”

11 Wi e bigin denki wisrefi nomo. Yona ati bron di Yehovah ben sori sari-ati gi den

sma fu Ninefei (Yona 4:1-3). Fu san ede? Di Yehovah no pora a foto moro soleki fa a ben taki, dan Yona bigin denki taki sma ben o si en leki wan falsi profeiti. A sori leki Yona ben e broko en ede moro nanga san sma ben o denki fu en. A no ben e prakseri den sma fu Ninefei di ben sori berow. A sani disi kan pasa nanga wi tu. Efu wi e prakseri nomo san sma o denki fu wi, dan wi ‘ati kan bron nanga Yehovah’ fu di a no tyari a kaba kon ete. Kande wi e preiki someni yari langa kaba taki a dei fu Yehovah de krosibei. Ma te wi e fruteri sma san Bijbel e taki èn den e spotu wi, dan kande wi ati o bron nanga Yehovah èn wi no o abi pasensi nanga den moro.—2 Petr. 3:3, 4, 9.

FA WI KAN SORGU TAKI WI ‘ATI NO BRON NANGA YEHOVAH’

12 San wi kan du te wi sondu ati e bigin denki takru fu son sani di Yehovah e du? No frigiti taki na wan don sani fu denki

12, 13. San wi musu du te wi bigin denki takru fu son sani di Yehovah e du?

10. Fa wan sma kan bigin denki leki Adam?

11. San wi kan leri fu a tori fu Yona?

so. Hori na prakseri taki Odo 19:3 e taki: „Na a don fu libisma meki taki den e pori den libi, ma toku den ati e bron srefisrefi nanga Yehovah.” Sobun, meki wi poti prakseri na feifi sani di kan yepi wi, so taki wi ati no bron nanga Yehovah.

¹³ **Du muiti fu tan wan bun mati fu Yehovah.** Wan sani di wi kan du fu no ati bron nanga Gado, na te wi e tan wan bun mati fu en. (*Leisi Odo 3:5, 6.*) Wi musu frutrow na tapu Yehovah. Wi musu luku bun tu taki wi no bigin denki taki wi sabi ala sani noso taki wi prenspari moro tra sma (Odo 3:7; Preik. 7:16). Te wi e hori den sani disi na prakseri, dan dati o yepi wi fu no denki taki Yehovah e meki wi kisi problema.

¹⁴ **No meki sma di lobi krutu fu son sani abi krakti na yu tapu.** Den Israelsma na ini a ten fu Moses ben abi nofo buweisi taki Yehovah ben o man yepi den fu teki a Pramisi Kondre abra (Ps. 78:43-53). Ma di den tin man fruteri takru sani fu a kondre dati, den Israelsma 'no ben memre a fasi fa Yehovah yepi den' (Ps. 78:42). Te wi e memre ala den bun sani di Yehovah du gi wi, dan wi o wani tan bun mati fu en. Te wi na mati fu en, dan wi no o arki te sma e taki takru sani fu Yehovah.—Ps. 77: 11, 12.

¹⁵ Ma fa a de te wi e taki takru fu wi Kresten brada nanga sisa? We, disi srefi kan pori a matifasi di wi abi nanga Yehovah (1 Yoh. 4:20). Di Aron tron granpries-ter, den Israelsma bigin krutu fu dati. Ma gi Yehovah, a ben de neleki den ben e krutu nanga en (Num. 17:10). Na so a de tu na ini a ten disi. Efu wi ben o bigin taki takru fu den sma di Yehovah e gebroiki fu tiri a wroko fu en dyaso na grontapu, dan

14, 15. San wi kan du fu no meki sma di lobi krutu fu son sani, abi krakti na wi tapu?

a ben o de neleki na krutu wi e krutu nanga Yehovah.—Hebr. 13:7, 17.

¹⁶ **Hori na prakseri taki a no Yehovah e meki wi kisi problema.** Den Israelsma na ini a ten fu Yesaya ben drai baka gi Yehovah, ma toku Yehovah ben wani yepi den (Yes. 1:16-19). Awinsi sortu problema wi abi, wi kan kisi trowstu te wi e hori na prakseri taki Yehovah lobi wi èn a wani yepi wi (1 Petr. 5:7). Yehovah pramisi wi srefi taki a o gi wi krakti fu man horidoro.—1 Kor. 10:13.

¹⁷ Ogri ben miti Yob aladi a ben e dini Yehovah nanga en heri ati. Te wan ogri miti wi, wi no musu frigiti taki a no Yehovah du dati. Yehovah no lobi kruktudu, a lobi retidu (Ps. 33:5). Meki wi de leki Elihu di ben taki: „A no tru kwetikweti taki Gado e du ogri! Noiti na Almaktiwan e du kruktu sani!” (Yob 34:10) Yehovah e gi wi „ibri bun presenti nanga ibri kado di bun dorodoro”. Noiti a e gi wi problema.—Yak. 1:13, 17.

¹⁸ **Noiti no denki ogri fu Yehovah.** Gado no de wan sondusma leki wi èn en prakseri hei moro di fu wi (Yes. 55:8, 9). Efu wi abi sakafasi, dan wi o frustan taki wi no sabi ala sani (Rom. 9:20). Nofo tron wi no sabi wan tori finifini. A no de fu taki dati wi alamala ondrofeni san na odo disi e taki: „A fosi sma di e opo taki gi ensrefi te sma e koti krutu gi en o kisi leti. Ma dan wan trawan e kon na inisei èn a e bigin poti aksi gi en fu tyari kon na krin fa sani de trutru.”—Odo 18:17.

¹⁹ Kon meki wi taki dati wan bun mati fu yu du wan sani di sma no gwentu du èn yu no e frustan fu san ede a du dati. Yu ben o taki wantewante dati a sani di a

16, 17. San wi no musu frigiti te wi abi problema?

18, 19. Fu san ede wi no musu denki ogri fu Yehovah noiti? Fruteri wan agersitori fu tyari disi kon na krin.



Yehovah blesi Yosua nanga Kaleb
fu di den ben e frutrow na en tapu
(Luku paragraaf 22)

du no bun? Nôno. Yu no ben o de gaw fu prakseri ogri fu yu mati, spesrutu efu yu sabi en furu yari kaba. Wi e frutrow wi mati aladi den na sondusma. We dan fa a de nanga wi hemel Tata Yehovah? A no de fu taki dati wi musu frutrow en, spesrutu fu di 'den pasi fu en hei moro den pasi fu wi èn den prakseri fu en hei moro den prakseri fu wi'.

20 No frigiti fu san ede wi e kisi problema. Wi musu frustan taki son leisi na wi srefi e du sani di e tyari problema kon (Gal. 6:7). Wi no musu taki dati Yehovah du dati. Fu san ede? Luku wan eksemple: Wan wagi kan rèi tranga. Ma efu wan sma e rèi tumusi tranga na ini wan boktu, dan a wagi kan drai tapu. Efu dati pasa, yu ben o taki dati na den sma di meki a wagi fowtu, noso na a sma di e rèi? Na so a de nanga wi tu. Yehovah gi wi pasi fu teki wi

eigi bosroiti èn a sori wi fa wi musu teki bun bosroiti. Sobun, efu wi abi problema, wi no kan taki dati na Yehovah e meki wi kisi problema, a no so?

21 Ma a no ala problema di wi e kisi e kon fu di wi teki don bosroiti. Son leisi ogri e miti wi fu di wi de na wan presi leti na a momenti te wan ogri e pasa (Preik. 9:11). Boiti dati wi no musu frigiti tu taki Satan Didibri na a sma di e meki ogri pasa na grontapu (1 Yoh. 5:19; Openb. 12:9). En na wi feanti, a no Yehovah!—1 Petr. 5:8.

NO MEKI NOTI PORI A MATIFASI FU YU NANGA YEHOWAH

22 Te yu e kisi problema, dan memre na eksemple fu Yosua nanga Kaleb. Den tu man disi no ben de leki den tra tin man di ben taki takru fu a kondre (Num. 14:6-9). Yosua nanga Kaleb sori taki den ben e bri-bi na ini Yehovah. Ma toku den ben musu waka 40 yari langa na ini a sabana makan-dra nanga den tra Israelsma. Ma yu denki taki den ben e krutukrutu fu a sani disi ede, noso den ben mandi? Nôno. Den tan frutrow na tapu Yehovah èn Yehovah blesi den. Aladi furu fu den Israelsma dede na ini a sabana, toku Yehovah meki Yosua nanga Kaleb pasa go na ini a Pramisi Kondre (Num. 14:30). Yehovah o blesi wi tu te wi „no kon weri” fu du a wani fu en.—Gal. 6:9; Hebr. 6:10.

23 Efu yu e firi brokosaka fu di yu abi problema, fu di tra sma du sani di no bun, noso fu di yu meki wan fowtu, dan san yu kan du? Memre taki Yehovah na wan Gado di bun srefisrefi. Prakseri den moi sani di Yehovah pramisi yu. Aksi yusrefi: 'Fa mi libi ben o de efu mi no ben sabi Yehovah?' Du mui fu tan Yehovah mati ala ten. Noiti yu ati musu bron nanga en!

22, 23. San wi musu hori na prakseri te wi e firi brokosaka fu di wi abi problema?

20, 21. Fu san ede wi e kisi problema?

„LUKU, pikin de a gudu di Yehovah gi yu. Den pikin di e komoto na ini yu bere, na wan blesi fu en”, na so Bijbel e taki (Ps. 127:3). Sobun, wi kan frustan taki Kresten papa nanga mama e prisiri srefisrefi te den kisi wan pikin.

Te wan pikin gebore, dan disi e tyari furu prisiri kon, ma a de wan bigi frantwotu tu. Efu papa nanga mama wani taki a pikin fu den gro kon tron wan gosontu bigisma, dan doronomo den musu gi en bun nyanyan nanga sorgu. Efu den wani taki a pikin fu den tanapu káinkan na ini a tru anbegi, dan doronomo den musu gi en Bijbel leri èn den musu leri en fa fu gebroi-ki den sani dati na ini en libi (Odo 1:8). O ten den musu bigin gi en leri èn sortu leri den musu gi en?

.....

Papa nanga mama

Bigin gi
yu pikin leri
frukufuku kaba



PAPA NANGA MAMA ABI A YEPI FU GADO FANOWDU

Meki wi luku a tori fu Manowa, wan man fu a lo fu Dan. A ben e libi na ini a foto Sora na ini Israel fu ow-ruten. En wefi no ben man kisi pikin. Ma bakaten na engel fu Yehovah taigi en wefi taki den ben o kisi wan manpikin (Krut. 13:2, 3). A no de fu taki dati Manowa nanga en wefi ben prisiri trutru di den kisi a boskopu disi. Ma a boskopu ben e gi den bigi broko-edetu. Dati meki Manowa begi Yehovah: „No mandi nanga mi, Yehovah. Didyonsro yu seni wan man fu a tru Gado kon. Mi e begi yu fu seni en kon baka fu fruteri wi fa wi musu kweki a pikin di wi o kisi” (Krut. 13:8). A broko-edetu di Manowa nanga en wefi ben abi, ben de taki den ben wani sabi fa fu kweki a pikin di den ben o kisi. A no de fu taki dati den leri Simson, a manpikin fu den, den wèt fu Gado èn a de krin taki a ben e gi yesi na den wèt dati. Na ini Bijbel wi e leisi: „A yeye fu Yehovah kon na Simson tapu.” Dati meki Simson ben man du ala sortu kefalet sani leki krumaman na ini Israel.—Krut. 13:25; 14:5, 6; 15:14, 15.

O ten papa nanga mama musu bigin gi den pikin leri? „Sensi di [Timoteyus] ben de wan beibi”, en mama Enise nanga en granmama Lowis ben e leri en „den sani di skrifti na ini den Santa Buku” (2 Tim. 1:5; 3:15). Sobun, Timoteyus bigin kisi leri fu Gado Wortu di a ben de yonguyongu ete.

A de wan koni sani te Kresten papa nanga mama e begi Yehovah fu sori den fa fu kweki den pikin. A de wan bun sani tu te den e sreka sani na fesi, so taki den kan bigin gi a pikin leri te a de „wan beibi” ete. „Te wan sma e wroko tranga, dan den sani di a abi na prakseri fu du o tyari wini kon gi en”, na so Odo 21:5 e taki. A no de fu taki dati papa nanga mama wani sreka sani bun fosi a pikin gebore. Kande den skrifti ala sani na tapu papira srefi fu de seiker taki den no frigiti wan sani. Ma a prenspari tu fu luku fa den o leri a pikin sani fu Gado. Den musu seti sani so taki den kan gi a beibi leri frukufuku kaba.

Wan buku di e taki fu pikin-nengre e taki: 'Na ini den fosi mun na edetonton fu wan pikin e wroko na so wan fasi taki a pikin man leri furu sani na ini wan syatu pisi ten' (*Early Childhood Counts—A Programming Guide on Early Childhood Care for Development*). Sobun, a de wan koni sani te papa nanga

mama e bigin gi a pikin Bijbel leri na ini a syatu pisi ten disi!

Wan mama di de wan gewoon pionier taki fu a pikin meisje fu en: „A ben abi tu mun nomo di mi bigin tyari en go na ini a preikiwroko. Aladi a no ben man frustan san ben e pasa, toku mi denki taki disi yepi en furu. Di a ben abi sowan tu yari, a no ben frede fu gi traktaat na den sma di wi ben e miti na ini a preikiwroko.”

Te wan pikin kisi leri frukufuku kaba, dan dati e tyari bun bakapisi kon. Ma papa nanga mama sabi tu taki a no makriki son leisi fu gi den pikin Bijbel leri.

„GEBROIKI A TEN FU UNU NA WAN KONI FASI”

A no makriki gi papa nanga mama fu gi den yongu pikin Bijbel leri, fu di pikin-nengre no man sidon pî tumusi langa èn den no man poti prakseri na wan sani tumusi langa tu. Ibri tron baka wan tra sani kan hari den prakseri, fu di den wani sabi ala sani di e pasa na den lontu. San papa nanga mama kan du fu meki den pikin poti prakseri na san den wani leri den?

Luku san Moses taki na ini Deuteronomium 6:6, 7: „Den sani di mi e taigi unu tide, musu de na ini un ati. Un musu leri un pikin den sani disi ibri tron baka, so taki den no frigiti den. Taki fu den sani disi te unu e sidon na ini un oso, te unu e waka na strati, te unu e didon, èn te unu opo.” Soleki fa a tekst e sori, dan papa nanga mama musu leri den pikin wan sani **ibri tron baka**. Wan pikin-nengre de leki wan pransun di yu musu gi watra **ibri tron baka**. Efu a moro makriki gi bigisma fu hori wan sani na ede te den e yere en ibri tron baka, dan wi kan frustan taki pikin-nengre musu yere wan sani ibri tron baka tu fu man hori en na ede!

Efu papa nanga mama wani leri den pikin sani fu Gado, dan den musu poti ten na wan sei fu du sani makandra nanga den. Disi no de wan makriki sani na ini a ten disi pe sma abi so furu fu du. Ma na apostel Paulus ben taki dati wi musu 'gebroiki a ten fu wi na wan koni fasi'. Sobun, wi musu meki ten fu du den sani di Kresten musu du (Ef. 5:15, 16). Fa wi kan meki ten fu du den sani disi? Wan brada di de wan owruman na ini a gemeente ben musu luku fa a ben o meki ten fu gi en umapikin leri, fu sorgu gi a gemeente èn fu du en grontapuwroko na a srefi ten. Fu di en wefi na wan gewoon pionier, meki en srefi

Manowa ben begi
Yehovah fu sori den
fa den ben musu
kweki a pikin di
den ben o kisi



no abi furu ten. Sobun, fa a trowpaar disi meki ten fu gi na umapikin fu den Bijbel leri? A brada taki: „Ibri mamanten fosi mi e go na wroko, mi nanga mi wefi e leisi a buku *Mi buku nanga Bijbel tori* gi en noso wi e leisi a deitekst makandra. Na mofoneti wi e sorgu taki wi e leisi wan sani gi en fosi a go sribi èn wi e tyari en tu te wi e go na ini a preikiwroko. Wi wani gebroiki den fosi yari fu en libi fu gi en Bijbel leri so furu leki wi man.”

'PIKIN DE LEKI PEIRI'

A no de fu taki dati wi wani taki den pikin fu wi grokon tron bigisma di man tyari frantwortu. Ma a moro prenspari sani fu san ede wi e gi den leri, na fu di wi wani taki den lobi Gado nanga den heri ati.—Mark. 12:28-30.

Psalms 127:4 taki: „Den pikin di yu kisi di yu ben de

wan yonkuman ete, de leki peiri na ini na anu fu wan tranga man.” Sobun, pikin de leki peiri di musu doro a marki fu den. Te wan sma o sutu wan peiri nanga wan bo, a man seti a peiri fu doro a marki, solanga a e hori en ete. Ma te a lusu a peiri kaba, a no man du noti moro fu meki a peiri doro a marki. Na so a de tu nanga papa nanga mama. Den no abi furu ten fu seti den „peiri” fu den, so taki den e doro a marki. Na ini a syatu pisi ten di den abi, den musu du ala mukti fu meki den leri fu Gado saka go dipi na ini na ati nanga a frustan fu den pikin.

Na apostel Yohanes di ben si son Kresten leki pikin fu en, ben taki: „Nowan tra sani e gi mi moro prisiri leki te mi e yere taki den pikin fu mi e tan du san den leri” (3 Yoh. 4). Kresten papa nanga mama e prisiri tu te den e si taki den pikin fu den „e tan du san den leri”.



POTI PRAKSERI NA MAKANDRA ÈN GI MAKANDRA DEKI-ATI

*„Meki wi poti prakseri
na makandra tu, so
taki wi kan gi makan-
dra deki-ati fu abi lobi
èn fu du bun wroko.”*

—HEBR. 10:24.

SAN YU BEN O PIKI?

San a wani taki fu „poti prakseri
na makandra”?

Fa wi kan yepi makandra fu sori
„lobi èn fu du bun wroko”?

Fa wi kan „gi makandra
deki-ati”?

DI A legre fu Hitler si taki den ben o lasi a Di Fu Tu Grontapufeti, den bosroiti fu kiri den dusundusun sma di den ben e hori na ini den strafuman-kampu. Den ben o meki den strafuman fu a strafuman-kampu na ini Sachsenhausen waka wan langa pasi go na sesyoro pe den ben o poti den na ini sipi. Dan den ben o sungu den sipi nanga ala sma na ini. Bakaten sma kari a sani disi di den srudati fu Hitler ben wani du „a dedewaka”.

² Dritenti na dri dusun strafuman fu a strafuman-kampu na ini Sachsenhausen ben musu waka sowan 250 kilometer go na Lübeck, wan foto fu Doisrikondre di ben abi wan lanpe. Na mindri den strafuman disi yu ben abi 230 Yehovah Kotoigi fu siksi difrenti kondre. Den srudati ben taigi den fu waka makandra. Ala den strafuman ben kon swaki fu di den ben e siki èn angri ben e kiri den. Ma toku ala den Kotoigi tan na libi. Fa dati kan? Wan fu den taki: „Doronomo wi ben e gi makandra deki-ati fu go doro.” Den ben man tan na libi fu di den ben e sori lobi gi makandra èn Gado ben gi den „krakti di bigi pasa marki”.—2 Kor. 4:7.

³ Na ini a ten disi wi no abi fu waka wan „dedewaka”, ma wi e kisi furu tesi. Baka di Gado Kownukondre seti na ini 1914, den trowe Satan fu hemel kon na grontapu èn „a abi bigi atibron fu di a sabi taki en ten syatu” (Openb. 12:7-9, 12). O moro Armagedon e kon krosibei, o moro Satan e meki wi kisi tesi fu swaki a bribi fu wi. Boiti dati, wi abi den broko-edede fu na aladei libi tu (Yob 14:1; Preik. 2:23). Son leisi wi kan kon weri fu ala den problema èn disi kan meki

1, 2. Fa 230 Yehovah Kotoigi ben man tan na libi na a kaba fu a Di Fu Tu Grontapufeti?

3. Fu san ede wi musu gi makandra deki-ati?

wi firi brokosaka awinsi san wi e du. Fu eksempre, wan brada ben gi furu sma deki-ati fu tan dini Yehovah. Ma di a kon owru, en nanga en wefi kon siki èn a bigin firi brokosaka srefisrefi. Neleki a brada disi, wi alamala musu suku yepi na Yehovah, a sma di e gi wi „krakti di bigi pasa marki”. Boiti dati wi musu gi makandra deki-ati tu.

⁴ Efu wi wani gi makandra deki-ati, dan wi musu teki a rai di na apostel Paulus ben gi den Hebrew Kresten. A ben taki: „Meki wi poti prakseri na makandra tu, so taki wi kan gi makandra deki-ati fu abi lobi èn fu du bun wroko. Meki wi no misi konmakandra, soleki fa son sma gweniti du, ma gi makandra deki-ati o moro unu e si a dei e kon krosibei” (Hebr. 10:24, 25). Fa wi kan du san skrifti na ini a tekst disi?

„MEKI WI POTI PRAKSERI NA MAKANDRA”

⁵ Efu wi wani „poti prakseri” na trawan, dan wi musu sabi san den abi fanowdu. Ma efu wi e taki den odi nomo na ini a Kownukondre zaal noso efu wi e taki soso fu sani di no de so prenspari, dan wi no o sabi san den abi fanowdu. Na a tra sei, wi musu luku bun taki wi „no bumui nanga tra sma tori” (1 Tes. 4:11; 1 Tim. 5:13). Ma toku wi musu du muiti fu sabi den brada nanga sisa fu wi moro bun. Wi musu sabi a situwâsi fu den, wi musu sabi den maniri fu den, fa a brîbi fu den de, sortu bun fasi den abi èn sortu swakifasi den abi. Den musu si wi leki den mati èn den musu sabi taki wi lobi den. Fu dati ede wi musu meki ten gi den. Wi no musu du dati soso te den abi problema noso te den e firi brokosaka. Wi musu du dati na tra okasi tu.—Rom. 12:13.

4. Sortu rai fu na apostel Paulus wi musu teki efu wi wani gi makandra deki-ati?

5. Efu wi wani „poti prakseri” na trawan, dan san wi musu du?

⁶ Bijbel e taki dati owruman musu de klariklari fu sorgu gi „den skapu fu Gado” èn den musu du dati nanga prisiri (1 Petr. 5:1-3). Den no kan du disi na wan bun fasi efu den no sabi den sma na ini a gemeente. (*Leisi Odo 27:23.*) Te den owruman e sori taki den de klariklari fu yepi den brada nanga sisa èn te den e sori taki den lobi fu de nanga den, dan den brada nanga sisa no o frede fu suku yepi na den. A o moro makriki gi den fu fruteri den owruman fa den e firi èn sortu broko-edede den abi. Na so den owruman o man yepi ibriwan fu den di abi yepi fanowdu.

⁷ Paulus ben taigi a gemeente na ini Tesalonika: „Yepi den swakiwan.” (*Leisi 1 Tesalonikasma 5:14.*) Sma di lasi-ati èn di e firi brokosaka na „swakiwan” tu. Odo 24:10 e taki: „Yu e firi brokosaka te nowtu miti yu? Efu dati de so, dan yu no o abi furu krakti.” Te wan sma e firi brokosaka srefisrefi, dan a kan taki „dondon sani” (Yob 6:2, 3). Te wi e „poti prakseri” na den sortu sma disi, wi no musu frigitaki taki son leisi den kan taki sani di no bun. Ma disi no wani taki dati na so den de trutru. Rachelle ondofeni a sani disi di en mama ben e firi brokosaka srefisrefi. Rachelle taki: „Furu tron Mama ben e taki hati sani. Ma dan mi ben e pruberi fu hori na prakseri fa a de trutru. Mi sabi en leki wan lobi-ati mama di abi switifasi èn di lobi gi sma sani. Mi kon si taki te wan sma e firi brokosaka srefisrefi, dan furu tron a e taki sani di no de na ini en ati trutru. A moro ogri sani di yu kan du, na fu taigi en noso du en wan hati sani baka.” Odo 19:11 e taki: „Koni fu man si sani krin e meki taki wan man en ati no e bron esi

6. San o yepi wan owruman fu „poti prakseri” na den sma na ini a gemeente?

7. Te wan sma e firi brokosaka srefisrefi, a kan taki „dondon sani”. Fa wi musu si dati?



Gi makandra deki-ati na ini a preikiwroko



Gi makandra deki-ati fu abi lobi èn fu du bun wroko

èn a moi te wan sma no e prakseri den fowtu fu trawan moro."

⁸ Fa wi kan „poti prakseri” na wan sma di e firi brokosaka fu di a ben du wan sondu? Kande a meki sani kon bun baka nanga Gado, ma a e syen ete fu a sani di a ben du. Na ini a gemeente fu Korente wan sma ben du wan sondu, ma bakaten a sori berow fu a sani di a du. Paulus ben taigi den Kresten na ini a gemeente dati: „Now un musu gi en pardon nanga un heri ati èn un musu trowstu en, so taki a sma dati no sari so te, taki a lasi-ati. Fu dati ede mi e begi unu fu sori en taki unu lobi en” (2 Kor. 2:7, 8). Sobun, wi musu **sori** taki wi lobi so wan sma. Wi no musu denki taki a sma e frustan taki wi lobi en èn taki wi e broko wi ede nanga en. A musu man si dati na a fasi fa wi e libi nanga en.

„ABI LOBI ÈN DU BUN WROKO”

⁹ „Meki wi poti prakseri na makandra

8. Spesrutu gi suma wi musu sori lobi èn fu san ede?

9. Fa wi kan „gi makandra deki-ati fu abi lobi èn fu du bun wroko”?

tu, so taki wi kan gi makandra deki-ati fu abi lobi èn fu du bun wroko”, na so Paulus ben skrifi. Wi musu yepi wi brada nanga sisa fu sori lobi èn fu du bun sani. Kon meki wi taki dati yu meki wan faya. Efu yu no wani taki a dede, dan yu musu tan poti udu gi en èn yu musu wai en (2 Tim. 1:6). Neleki fa wi musu du sani fu meki wan faya tan bron, na so wi musu du sani tu fu yepi wi brada nanga sisa fu tan dini Yehovah fayafaya. Wan fu den moro bun fasi fa wi kan du dati, na fu prèise den fu den bun sani di den e du.

¹⁰ A prenspari fu prèise trawan ala ten. Wi no musu du dati soso te den e firi brokosaka. Wan brada ben skrifi: „Mi papa noiti no taigi mi taki mi du wan sani bun.” Di a brada disi ben e gro kon bigi a ben e firi leki a no man du nowan sani bun. Aladi a abi 50 yari now, toku a e warderi en trutru te sma e taigi en taki a e du en wroko bun leki owruman. Fu di en srefi

10, 11. (a) Suma wi musu prèise? (b) Gi wan eksemple di e sori fa wan sma di meki wan fowtu kan du bun baka te sma e prèise en.



Leri sabi yu brada nanga sisa moro bun

ondrofeni o prenspari a de fu kisi deki-ati, meki a e suku iniwan okasi fu prèise trawan. Wi alamala e firi bun te wan trawan e taigi wi taki wi e du wan sani bun, awinsi wi na pionier, owru sma, noso sma di lasi-ati.—Rom. 12:10.

¹¹ Te owruman e pruberi fu yepi wan sma di meki wan fowtu, dan den kan prèise en fu den bun sani di a du na ini a ten di pasa. Disi kan yepi a sma fu kenki en denki so taki a kan du bun baka (Gal. 6:1). Na disi pasa nanga wan sisa di nen Miriam. A sisa disi skrifi: „Wan tu bun mati fu mi tapu fu dini Yehovah èn na a srefi ten brudu naki mi papa. A ben de wan mulek ten gi mi trutru. Mi ben e firi brokosa-ka doronomo. Fu man frigiti ala sani, mi begin hori nanga wan grontapu man.” Disi ben meki a sisa firi leki a no warti fu Yehovah lobi en èn a ben wani tapu fu dini Yehovah. Ma wan owruman memre en fa a ben dini Yehovah fayafaya èn a sori en taki Yehovah lobi en ete. A sani disi naki en ati trutru èn a kon lobi Yehovah baka. A libi a man èn a tan dini Yehovah.

¹² Wi musu luku bun fa wi e gi wi brada nanga sisa deki-ati fu tan dini Gado fayafaya. Wi no musu teki den gersi nanga trawan, wi no musu krutu den fu di den no e du sani soleki fa wi wani, èn wi no musu gi den a firi taki den no e du ala san den man na ini a diniwroko. Kande den o du sani nanga moro faya te wi e du den sani disi fu gi den deki-ati, ma den no o du dati langa. A moro bun fasi fa wi kan gi wi brada nanga sisa deki-ati, na fu prèise den èn fu yepi den frustan taki den musu dini Gado fu di den lobi en.—*Leisi Filipi-sma 2:1-4.*

„GI MAKANDRA DEKI-ATI”

¹³ Paulus ben taki: „Gi makandra deki-ati o moro unu e si a dei e kon krosibei.” A deki-ati di wi e gi trawan de leki na udu di wi e poti gi wan faya fu meki a faya tan bron, noso fu meki a kon moro bigi. Te wi e gi wi brada nanga sisa deki-ati, dan den e kisi krakti nanga trowstu, so taki den kan tan dini Gado. Te wi e pruberi fu yepi den wan di lasi-ati, dan wi musu taki nanga den na wan lobi-ati fasi èn na wan switi fasi (Odo 12:18). Boiti dati wi musu de „gaw fu yere”, wi no musu de „gaw fu taki” (Yak. 1:19). Efu wi e arki a sma èn wi e pruberi fu frustan fa a e firi, dan kande wi o man si fu san ede a lasi-ati èn wi o man taki wan sani di o gi en deki-ati trutru.

¹⁴ Luku fa wan owruman di abi switifa-si yepi wan brada di ben tapu fu preiki wan tu yari kaba. Di na owruman arki en, a kon si taki a brada lobi Yehovah trutru.

^{12.} San kan pasa te wi e teki sma gersi nanga trawan, te wi e krutu den, èn te wi e gi den a firi taki den no e du nofo?

^{13.} Fa wi kan gi trawan deki-ati? (Luku a prenki na a begin fu na artikkel.)

^{14.} Fa wan owruman yepi wan brada di ben lasi-ati?



Wi musu abi pasensi èn wi musu arki
den wan di abi deki-ati fanowdu
(Luku paragraaf 14, 15)

A ben e studeri ibri *Waktitoren* èn a ben e du mui fu go na den konmakandra dorumo. Ma son sma na ini a gemeente ben du sani di meki taki a brada disi mandi èn a lasi-ati. Na owruman ben e arki bun èn a ben pruberi fu frustan fa a brada ben e firi. A no krutu a brada, ma a sori en taki den brada nanga sisa lobi en èn den e broko den ede nanga en trutru. Bakaten a brada kon frustan taki a ben meki den sani di a ondrofeni abi so furu krakti na en tapu, taki a no ben wani dini a Gado moro di a ben lobi so te. Na owruman ben aksi a brada fu go na ini a preikiwroko makandra nanga en. Na so na owruman yepi a brada fu preiki baka èn bakaten a brada disi tron wan owruman baka.

¹⁵ Te wan sma lasi-ati, dan a no ala ten a o wani teki a yepi di wi wani gi en èn a no ala ten a o firi bun wantewante. Ma Paulus ben taki: „Yepi den swakiwan èn **abi pasensi** nanga ala sma” (1 Tes. 5:14).

15. San wi kan leri fu a fasi fa Yehovah e gi sma deki-ati?

Sobun, wi no musu gi abra te wi si taki a deki-ati fu wi no e yepi wantewante. Na presi fu dati wi musu abi pasensi. Na ini owruten Yehovah ben abi pasensi tu nanga den futuboi fu en di ben lasi-ati. Fu eksemple, Yehovah ben abi furu pasensi nanga Elia èn a ben e hori den firi fu en na prakseri. A ben gi Elia san a ben abi fanowdu fu man go doro nanga a diniwroko fu en (1 Kow. 19:1-18). Wan tra eksemple na David. Fu di a ben sori berow trutru, meki Yehovah sori switifasi gi en èn a gi en pardon (Ps. 51:7, 17). Boiti dati Gado ben yepi a skrifiman fu Psalm 73 di ben wani tapu fu dini en (Ps. 73:13, 16, 17). Yehovah e sori wi switifasi èn a abi pasensi nanga wi, spesrutu te wi e firi brokosaka noso te wi lasi-ati (Eks. 34:6). „Ibri mamanten baka a e sori sari-ati” èn „noiti wan ten o kon taki a no e sori sari-ati” (Sari 3:22, 23). Yehovah wani taki wi musu de leki en èn wi musu sori switifasi tu gi den wan di lasi-ati.

GI MAKANDRA DEKI-ATI FU TAN WAKA NA TAPU A PASI DI E TYARI SMA GO NA LIBI

¹⁶ Dusundusun strafuman di gowe libi a strafuman-kampu na ini Sachsenhausen lasi libi. Ma ala den 230 Yehovah Koitoigi di gowe libi a kampu dati tan na libi. Den no ben o tan na libi efu den no ben gi makandra deki-ati èn efu den no ben yepi makandra.

¹⁷ Na ini a ten disi wi de na tapu a pasi „di e tyari sma go na libi” (Mat. 7:14). Heri esi ala sma di e anbegi Yehovah o pasa go na ini a nyun grontapu pe soso retidu o de (2 Petr. 3:13). A kaba fu na ogri grontapu fu Satan e kon moro krosibei. Fu dati ede meki wi yepi makandra fu tan na tapu a pasi di e tyari sma go na libi.

16, 17. San wi musu du o moro a kaba fu a grontapu disi e kon krosibei? Fu san ede?



SORTU SMA YU MUSU DE?

*„Un musu luku sortu
sma un musu de.
Tyari unsrefi na wan
santa fasi èn du sani
di e sori taki unu e
dini Gado fayafaya.”*

—2 PETR. 3:11.

SAN YU BEN O PIKI?

Sortu sma yu musu de efu yu
wani taki Gado feni yu bun?

Fa Satan e kori sma?

San yu kan du fu tan wan mati
fu Yehovah?

FURU sma e broko den ede nanga san trawan e denki fu den. Ma leki Kresten wi musu broko wi ede moro nanga san Yehovah e denki fu wi. En na a moro prenspari sma fu hemel nanga grontapu, èn en „na a sma di e gi libi”.—Ps. 36:9.

² Na apostel Petrus ben sori san wi musu du efu wi wani taki Yehovah feni wi bun. A taki: „Tyari unsrefi na wan santa fasi èn du sani di e sori taki unu e dini Gado fayafaya.” (**Leisi 2 Petrus 3:11.**) A wan-enkri fasi fa wi kan ‘tyari wisrefi na wan santa fasi’, na te wi e libi wan krin libi. Disi wani taki dati a fasi fa wi e denki, den sani di wi e du, èn a fasi fa wi e anbegi Gado musu kruderi nanga a wani fu en. Boiti dati, wi musu „dini Gado fayafaya” fu di wi lobi en èn fu di wi abi bigi lespeki gi en. Sobun, Gado no e luku wawan san wi e du, ma a e luku tu fu san ede wi e du den sani dati. Yehovah „e ondosuku sma ati”. Dati meki a sabi efu wi e tyari wisrefi na wan santa fasi èn efu wi e anbegi en wawan.—1 Kron. 29:17.

³ Satan Didibri no wani taki Gado feni wi bun. Fu taki en leti, a e du ala san a man fu pori wi matifasi nanga Yehovah. Doronomo Satan e gebroiki lei fu kori wi, so taki wi tapu fu anbegi Yehovah (Yoh. 8: 44; 2 Kor. 11:13-15). Fu dati ede a bun fu aksi wisrefi: ‘Fa Satan e kori sma? San mi kan du fu tan wan mati fu Yehovah?’

FA SATAN E KORI SMA?

⁴ A disipel Yakobus ben skrifi: „Ibri sma e kisi tesi fu di en eigi lostu e hari en èn e kori en. Te a kweki

- 1, 2. San wi musu du efu wi wani taki Gado feni wi bun?
3. San wi musu aksi wisrefi efu wi wani tan mati fu Yehovah?
4. San Satan wani du fu pori wi matifasi nanga Gado èn fu san ede?



Eva sondu fu di a poti prakseri na den „lostu fu a skin”
(Luku paragraaf 7)

a lostu, a e tyari sondu kon te fu kaba. Te a sondu du kaba, dan dati e tyari dede kon” (Yak. 1:14, 15). Satan sabi taki efu a abi krakti na tapu wi ati noso den firi fu wi, a man pori wi matifasi nanga Gado.

⁵ San Satan e du fu abi krakti na tapu wi ati? Bijbel e taki: „Heri grontapu de na ini a makti fu na ogriwan” (1 Yoh. 5:19). Satan e gebroiki „den sani fu grontapu” fu kori wi. (*Leisi 1 Yohanes 2:15, 16.*) Na ini den dusundusun yari di pasa, Didibri seti bun furu sani na ini a grontapu disi fu kori sma. Fu di wi e libi na ini a grontapu disi, meki wi musu luku bun nanga den triki fu en.—Yoh. 17:15.

⁶ Satan e du son sani fu meki wi kweki takru lostu na ini wi ati. Na apostel Yo-

5, 6. (a) San Satan e du fu abi krakti na tapu wi ati? (b) San Satan e gebroiki fu meki wi kweki takru lostu na ini wi ati? (c) Fu san ede wi kan taki dati Satan sabi fa fu kori sma nanga den sani disi?

hanes taki fu dri sani di Satan e gebroiki fu kori wi: (1) „A lostu fu a skin”, (2) „a lostu fu den ai”, nanga (3) „a prodo di wan sma e prodo nanga den gudu di a abi”. Satan gebroiki den sani disi fu tesi Yesus na ini a sabana. Fu di Satan gebroiki den triki disi someni yari kaba, meki a sabi heri bun fa a kan kori sma nanga den sani disi. A sabi tu sortuwan a musu gebroiki fu kori iniwan sma. Meki wi luku fosi fa Didibri ben man kori Eva èn fu san ede a no ben man kori a Manpikin fu Gado. Baka dati wi o luku san wi kan du fu no meki a kori wi.

„A LOSTU FU A SKIN”

⁷ Ala libisma musu nyan fu kan tan na libi. A Mekiman meki grontapu na so wan fasi taki a man gi furu nyanyan. Satan kan gebroiki a lostu gi nyanyan fu meki wi du sani di Gado no feni bun. Meki wi luku fa a du disi nanga Eva. (*Leisi Genesis 3:1-6.*) Satan taigi Eva taki a no ben o dede efu a ben o nyan fu a „bon di nen ‘Sabi san bun èn san ogri’”. A taigi Eva taki a ben o kon de leki Gado efu a nyan a froktu (Gen. 2:9). Na so Didibri ben wani sori Eva taki a no abi fu gi yesi na Gado fu kan tan na libi. Dati ben de wan bigi lei! Eva ben kan du tu sani nanga a denki di Didibri ben poti na ini en ede: A ben kan kakafutu gi a denki disi, noso a ben kan tan prakseri en teleki a lostu fu nyan a froktu kon moro tranga. Aladi Eva ben kan nyan fu ala den tra bon na ini a dyari, toku a tan prakseri a sani di Satan taigi en fu a bon di ben de na min-drisei fu a dyari. Na so Satan meki taki Eva bigin lostu wan sani di a Mekiman fu en taigi en fu no nyan. „Ne a piki wan froktu fu a bon, dan a nyan fu en.”

7. Fa Satan gebroiki „a lostu fu a skin” fu kori Eva?

⁸ Satan pruberi fu kori Yesus nanga a srefi triki disi. Di Yesus ben de na ini a sabana, a no ben nyan 40 dei nanga 40 neti. Sobun, angri ben musu fu kiri en. Dati meki Satan ben wani kori en nanga a lostu gi nyanyan. A taki: „Efu yu na wan manpikin fu Gado, dan taigi a ston disi fu tron brede” (Luk. 4:1-3). Yesus ben kan du tu sani: A ben kan du wan wondru fu meki den ston tron brede èn nyan den, noso a ben kan bosroiti fu no du dati. Yesus ben sabi taki a no ben musu gebroiki en krakti fu plisi ensrefi. Aladi angri ben e kiri en, toku a matifasi di a abi nanga Gado ben de moro prenspari gi en leki nyanyan. Dati meki Yesus piki Satan: „Gado Buku taki: ‘Sma no musu libi fu brede wawan, ma fu ibri wortu di Yehovah mofo taki.’”—Mat. 4:4.

„A LOSTU FU DEN AI”


⁹ Yohanes ben taki dati „a lostu fu den ai” na ete wan sani di Satan e gebroiki fu kori sma. Disi e sori taki na luku wan sma musu luku wan sani nomo, fu kweki lostu gi en. Satan kori Eva nanga a lostu disi. A taigi en: „Un ai o opo.” O moro Eva ben e luku a froktu, o moro a ben lostu en. Ne Eva kon si taki a bon „ben moi fu si”.

¹⁰ Fa Satan pruberi fu kori Yesus nanga „a lostu fu den ai”? „Na ini wan syatu pisi ten [Didibri] sori Yesus ala den kownukondre fu heri grontapu. Dan Didibri tai-gi en: ‘Mi o gi yu ala a makti nanga a glori

8. (a) Fa Satan ben wani gebroiki „a lostu fu a skin” fu kori Yesus? (b) Fu san ede Satan no ben man kori Yesus?

9. (a) San den wortu „a lostu fu den ai” e sori? (b) Fa Satan gebroiki a lostu disi fu kori Eva?

10. (a) Fa Satan ben wani gebroiki „a lostu fu den ai” fu kori Yesus? (b) San Yesus piki Satan?



A matifasi di Yesus ben abi nanga Gado ben de a moro prenspari sani gi en (Luku paragraaf 8)

fu den kownukondre disi’ ” (Luk. 4:5, 6). A no de fu taki dati Yesus no ben o man si ala den kownukondre fu heri grontapu wantronso. Ma Satan meki a si den na ini wan fisyun. A musu de so taki Satan ben e denki taki a ben o man kori Yesus nanga a moi fu den kownukondre disi. Sondro fu syen, a taigi Yesus: „Efu yu anbegi mi wán leisi nomo, dan ala den sani disi sa de fu yu” (Luk. 4:7). Yesus no ben wani arki Satan kwetikweti. Wantewan-te a piki Satan: „Gado Buku taki: ‘Na Yehovah yu Gado, yu musu anbegi èn na en wawan yu musu dini.’”—Luk. 4:8.

„A PRODO DI WAN SMA E PRODO NANGA DEN GUDU DI A ABI”

¹¹ Yohanes ben taki tu fu „a prodo di wan sma e prodo nanga den gudu di a abi”. Wi kan frustan taki di Adam nanga

11. Fa Satan kori Eva?



Sortu Bijbeltekst musu kon na yu prakseri te yu de na ini den situwâsi disi?
(Luku paragraaf 13, 14)

Eva ben de den wan-enkri libisma na grontapu, den no ben e meki bigi nanga den gudu fu den, fu di tra sma no ben de. Ma toku den kisi heimemre. Satan meki Eva bribi taki a ben abi a reti fu kisi wan kefalek moi sani, ma Gado no ben wani gi en dati. Didibri taigi en taki efu a ben o nyan fu „a bon di nen ‘Sabi san bun èn san ogri’”, a ben „o de leki Gado”. A „ben o sabi san bun èn san ogri” (Gen. 2: 17; 3:5). Satan ben wani meki Eva bribi taki a no abi Yehovah fanowdu. A kan tu taki heimemre meki taki Eva bribi a lei disi. A nyan fu a bon nanga a denki taki a no ben o dede. Dati ben de wan bigi fowtu!

¹² Tra fasi leki Eva, Yesus ben abi sakafasi èn dati na wan moi eksemple gi wi. Satan ben wani taki Yesus ben musu du wan sani fu sori o kefalek a de. Ma Yesus no du dati kwetikweti fu di disi ben o sori taki a abi heimemre èn taki a ben e tesi Gado. A piki Satan krin: „Gado Buku taki: ‘Yu no musu tesi Yehovah yu Gado.’” —*Leisi Lukas 4:9-12*.

12. (a) San na wan fasi fa Satan ben wani kori Yesus? (b) San Yesus pikin en?

SAN WI MUSU DU FU TAN WAN MATI FU YEHOVAH?

¹³ Na ini a ten disi Satan e kori sma nanga den srefi triki di a gebroiki fu tesi Eva nanga Yesus. A e gebroiki „a lostu fu a skin” fu kori sma fu meki den du sani di no fiti, èn fu meki den nyan èn dringi tumusi furu. A e gebroiki „a lostu fu den ai” fu meki sma luku porno noso fisti sektori, spesrutu tapu Internet. Boiti dati, a e gebroiki a lostu di sma abi fu ‘prodo nanga den gudu di den abi’. Na so a e meki sma kisi heimemre èn a e meki den du ala sani fu kisi makti, biginen nanga gudu.

¹⁴ Satan e gebroiki „den sani fu grontapu” leki beti di wan fisiman e gebroiki fu hari fisi kon. A beti e hari den fisi, ma na inisei fu a beti wan aka de. Na so Satan e du tu nanga libisma. Satan e gebroiki aladei sani fu kori sma fu meki den trangayesi den wèt fu Gado. A e meki den bribi taki son sani no fowtu, noso a e meki den bribi taki den abi son sani fanowdu. Nanga den sani disi, Satan wani meki wi kisi takru lostu èn a wani pori wi ati. A

13, 14. Fa Satan e pruberi fu kori wi na ini a ten disi?

wani meki wi bribi taki wi eigi afersi èn wan switi libi prenspari moro leki a wani fu Gado. Yu o meki Satan kori yu nanga den sani disi?

¹⁵ Eva meki Satan kori en, ma Yesus kakafutu gi en. Ibri leisi te Satan ben tesi en, Yesus gebroiki Gado Wortu fu piki en. A ben e taki: „Gado Buku taki.” Efu wi e studeri Bijbel bun, dan wi o sabi en bun tu èn wi o man memre Bijbeltekst di kan yepi wi fu si sani krin te wi e kisi tesi (Ps. 1:1, 2). Te wi e prakseri den eksempe fu sma na ini Bijbel di tan gi yesi na Gado, dan dati sa yepi wi fu tan gi yesi na Gado tu (Rom. 15:4). Te wi abi bigi lespeki gi Yehovah, sobun te wi lobi san a lobi èn te wi no lobi san a no lobi, dan Satan no o man kori wi.—Ps. 97:10.

¹⁶ Na apostel Paulus gi wi deki-ati fu gebroiki wi „frustan” so taki wi no tron sma di abi a denki fu grontapu. Na presi fu dati wi musu tron sma di e denki soleki fa Yehovah e denki (Rom. 12:1, 2). Paulus memre wi taki wi musu luku bun san wi e prakseri. A taki: „Den sani di wi e broko na den fowtu denki fu sma èn ala sortu kefalek denki fu sma di de teige a sabi fu Gado. Wi e wini ala den denki disi. Dan den de leki katiboman èn wi e meki den gi yesi na Krestes” (2 Kor. 10:5). Den prakseri fu wi kan abi furu krakti na wi tapu èn dati meki ala ten wi musu „tan prakseri” sani di e plisi Gado.—Fil. 4:8.

¹⁷ Efu wi wani de santa sma, dan wi no kan sidon prakseri sani di no fiti èn wi no kan kweki takru lostu. Wi musu lobi Yehovah nanga „wan krin ati” (1 Tim. 1:5). Ma wi ati kan kori wi èn kande wi no sabi

15. Fa wi kan kakafutu gi Satan neleki fa Yesus ben du dati?

16, 17. Fa wi „frustan” kan abi krakti na wi tapu?

srefi o furu krakti „den sani fu grontapu” abi na wi tapu (Yer. 17:9). Fu dati ede a de prenspari taki wi teki a rai fu Paulus. A taki: „Tan ondrosuku efu unu de na bribi. Tan buweisi sortu sma unu de.” Te wi e studeri Bijbel, wi musu aksi wisrefi: ‘Den sani di mi e prakseri èn den sani di mi wani, na sani di Gado feni bun?’—2 Kor. 13:5.

¹⁸ Wan tra sani di kan yepi wi fu kakafutu gi „den sani fu grontapu”, na fu hori na prakseri san Yohanes taki: „Grontapu e pasa gowe nanga den lostu fu en, ma a sma di e du a wani fu Gado o tan fu têtgo” (1 Yoh. 2:17). A kan gersi leki a grontapu fu Satan o tan fu ala ten. Ma wan dei a o kon na wan kaba. Te wi e hori na prakseri taki ala sani na ini a grontapu disi o kon na wan kaba, dan Didibri no o man kori wi.

¹⁹ Na apostel Petrus e gi wi a rai fu du muiti fu de sma di Gado feni bun, aladi wi e ‘tan fruwakti a dei fu Yehovah. Wi musu tan hori bun na prakseri taki a dei dati e kon. Na a ten dati den hemel o bron na ini faya. A bigi faya disi o smèlter den sani di de wan pisi fu hemel nanga grontapu!’ (2 Petr. 3:12) Heri esi a dei dati o doro èn Yehovah o pori a heri grontapu fu Satan. Solanga a ten dati no doro, Satan o tan pruberi fu gebroiki „den sani fu grontapu” fu tesi wi, neleki fa a tesi Eva nanga Yesus. Wi no musu de leki Eva di ben wani plisi ensrefi. Efu wi e du dati, dan wi e sori taki Satan na wi gado. Neleki Yesus, wi musu kakafutu gi den triki fu Satan awinsi o moi den de. Meki ibriwan fu wi du tranga muiti fu de a sortu sma di Yehovah feni bun.

18, 19. Fu san ede wi musu du tranga muiti fu de a sortu sma di Yehovah feni bun?



Elisa ben si fetiwagi di abi faya YU E SI DEN TU?

A kownu fu Siria ben wani kisi Elisa, a profeiti fu Gado. A ben yere taki Elisa de na ini a foto Dotan di ben abi hei skotu èn di ben de na tapu wan bergi. Na neti, a kownu fu Siria seni den srudati fu en na tapu asi nanga asiwagi go na Dotan. Di son opo, a legre ben lontu a heri foto.—2 Kow. 6: 13, 14.

Di a futuboi fu Elisa opo go na dorosei, a si a legre di ben kon fu teki Elisa. A bari: „Ke, mi masra! San wi o du?” Elisa taigi en: „No frede, bika den wan di de nanga wi, de moro leki den wan di de nanga den.” Baka dati a profeiti begi Gado: „Ke Yehovah, mi e begi yu, opo en ai, so taki a kan si.” Bijbel e sori san pasa baka dati: „Wantewante Yehovah opo den ai fu a futuboi, so taki a ben kan si. Di a futuboi luku moro fini, a si taki a heri bergi-kontren ben lai nanga asi èn nanga fetiwagi. Den asi nanga den fetiwagi ben de leki faya. Na ala sei den ben lontu Elisa” (2 Kow. 6:15-17). San wi kan

leri fu a tori disi èn fu tra sani di pasa na ini a libi fu Elisa?

Elisa no ben bruya di a si taki a legre fu Siria lontu den, fu di a ben e frutrow na tapu Yehovah èn a ben si taki Yehovah ben o kibri en. Na ini a ten disi wi no e fruwakti taki Yehovah o du wondru fu kibri wi. Ma wi kan si krin taki Yehovah e kibri a pipel fu en. A de neleki wi e si a legre fu Gado na wi lontu. Efu wi e bribi taki Yehovah e kibri en pipel èn efu wi e frutrow na en tapu ala ten, dan wi no o frede èn a o blesi wi (Ps. 4:8). Meki wi luku san wi kan leri fu tra sani di pasa na ini a libi fu Elisa.

ELISA E BIGIN WROKO LEKI FUTUBOI FU ELIA

Wan dei di Elisa ben e plugu wan gron, a profeiti Elia go na en èn a poti en dyakti na Elisa tapu. Elisa ben sabi taki na so Elia aksi en fu tron en futuboi. Elisa hori wan fesa, a taki en papa nanga en mama odi, dan a gowe libi oso fu tron a futuboi fu Elia (1 Kow. 19:16, 19-21). Elisa ben de klariklari

fu du iniwan sani di Yehovah ben o taigi en fu du. Fu dati ede Yehovah meki a du furu sani èn te fu kaba A meki Elisa teki a presi fu Elia.

Elisa ben de Elia futuboi sowan siksi yari langa. Na ini den yari dati, Elisa „ben e kanti watra gi Elia fu wasi en anu” (2 Kow. 3:11). Na a ten dati sma ben gwent nyan nanga den anu. Te den ben kaba nyan, dan wan futuboi ben kanti watra gi en masra fu wasi en anu. Sobun, wan tu fu den wroko di Elisa ben musu du ben de pikin-pikin sani. Toku a ben si en leki wan grani fu de a futuboi fu Elia.

Na ini a ten disi, Kresten de klariklari fu du difrenti sortu furuten diniwroko. Fu san ede? Fu di den abi bribi na ini Yehovah èn den wani dini en nanga den heri ati. Sonwan fu den e gowe libi den oso fu go wroko na Betel noso fu go yepi bow Kownukondre zaal. Son leisi den e du wroko di furu sma e si leki pikin-pikin sani di no de so prenspari. Ma nowan fu wi musu denki so. Yehovah abi furu warderi gi ala den sani di den futuboi fu en e du.—Hebr. 6:10.

ELISA TAN DU A WROKO FU EN

Fosi Gado „seni wan bigi winti kon fu opo Elia tyari go na loktu”, a seni Elia fu Gilgal go na Betel. Elia taigi Elisa taki a no ben abi fu go nanga en, ma toku Elisa taki: „Mi no o gowe libi yu.” Di den ben de na pasi, Elia taigi Elisa ete tu leisi fu tan na baka, ma Elisa no ben wani (2 Kow. 2:1-6). Neleki fa Rut tan nanga Naomi, na so Elisa tan nanga Elia (Rut 1:8, 16, 17). Fu san ede? Elisa ben si en leki wan grani fu de a futuboi fu Elia fu di dati na a wroko di Gado ben gi en.

Elisa na wan moi eksemple gi wi. Iniwan sortu wroko di wi kisi fu du na ini Yehovah organisâsi, wi o si leki wan bigi grani te wi tan hori na prakseri taki na Yehovah wi e dini. Moro bigi grani leki dati no de.—Ps. 65:4; 84:10.

„TAIGI MI SAN MI MUSU DU GI YU”

Di Elia nanga Elisa ben de na pasi, dan Elia taigi Elisa: „Taigi mi san mi musu du gi yu, fosi Gado teki mi puru na yu.” Elisa taki: „Mi e begi yu, gi mi [tu pisi] fu a yeye di Gado gi yu.” Neleki fa Salomo

ben aksi Yehovah furu yari na fesi fu yepi en, na so Elisa aksi wan sani di ben o yepi en fu dini Yehovah moro bun (1 Kow. 3:5, 9; 2 Kow. 2:9). Te wan man na ini Israel ben e prati a famirigudu fu en, dan a fosi manpikin fu en ben e kisi tu tron moro furu leki den tra pikin (Deut. 21:15-17). Sobun, Elisa ben aksi efu a ben kan teki Elia en presi leki profeti. A sani di Elisa aksi ben sori tu taki a ben wani abi den srefi fasi fu Elia. A ben wani abi deki-ati neleki en èn a ben wani anbegi Yehovah fayafaya neleki en.—1 Kow. 19:13, 14.

San Elia piki a futuboi fu en? A taki: „Yu aksi mi wan muilek sani. Efu yu si nanga yu eigi ai fa Gado e teki mi puru na yu, dan yu o kisi san yu aksi. Ma efu yu no si a sani disi, dan yu no o kisi en” (2 Kow. 2:10). A piki fu Elia ben wani taki tu sani. A fosi sani na taki Gado wawan ben kan bosroiti efu Elisa ben o kisi san a aksi. A di fu tu sani na taki Elisa ben musu tan nanga Elia awinsi san e pasa.

SAN ELISA SI

Gado gi Elisa san a aksi? Bijbel e taki: „Now Elia nanga Elisa waka go moro fara. Den ben e taki nanga makandra ete di den si wan fetiwagi nanga asi e kon. A fetiwagi nanga den asi ben de leki faya. Dan den prati Elia nanga Elisa fu makandra. Baka dati wan bigi winti opo Elia go na loktu. . . . Elisa si san pasa.”* Na so Yehovah piki na aksi fu Elisa. Elisa si fa Elia gowe libi en èn a kisi tu pisi fu a yeye fu Elia. Na so a tron Gado profeti na presi fu Elia.—2 Kow. 2:11-14.

Elisa teki Elia en dyakti di ben fadon na gron, dan a weri en. Di sma si Elisa e weri a dyakti fu Elia, den ben sabi taki now Elisa na a profeti fu Gado. Bakaten di a prati a watra fu Yordan-liba a ben de moro krin fu si taki en na Gado profeti.

Noiti moro Elisa ben o frigiti san a si di a bigi winti opo Elia tyari gowe. Iniwan sma ben o fruwondru efu a ben o si wan fetiwagi nanga asi di de leki faya. Ma den sani disi sori Elisa krin taki Yehovah gi en san a ben aksi. Te Gado e piki den begi fu

* Elia no go na hemel pe Yehovah nanga den engel de. A profeti ben de na grontapu ete, bika a ben skripi wan brifi gi Kownu Yoram fu Yuda wan tu yari baka dati (2 Kron. 21:1, 12-15; Yoh. 3:13).

wi, dan wi no e kisi fisyun fu fetiwagi nanga asi di de leki faya. Ma wi abi **krin buweisi** taki Gado e ge-broiki en bigi krakti fu meki a wani fu en kon tru. Te wi e si taki Yehovah e blesi en pipel na grontapu, dan a de neleki wi e si fa en hemel wagi e go na fesi.—Esek. 10:9-13.

Elisa ondrofeni furu sani di gi en na overtoigi taki Yehovah abi bigi krakti. Fu taki en leti, a santa yeye fu Gado meki a profeiti du 16 wondru, dati na tu tron moro furu leki Elia.* A di fu tu leisi di Elisa si fetiwagi nanga asi di de leki faya, na di a ben de na Dotan, di a legre fu Siria ben lontu a foto.

ELISA BEN E FRUTROW NA TAPU YEHOVAH

Elisa no ben frede di den feanti fu en ben lontu a foto Dotan. Fu san ede? Fu di a ben abi wan tranga bribi na ini Yehovah. Wi musu abi so wan bribi tu. Fu dati ede, meki wi begi Gado fu gi wi en

* Luku A Waktitoren fu 1 augustus 2005, bladzijde 10.

santa yeye so taki wi kan abi bribi èn den tra fasi di a santa yeye e meki sma abi.—Luk. 11:13; Gal. 5:22, 23.

A musu fu de so taki a sani di pasa na Dotan meki Elisa frutrow moro na tapu Yehovah nanga den engel fu en. Gado ben seni den engel fu en fu lontu a foto èn fu kibri Elisa. Dan Gado breni den feanti èn na so a frulusu Elisa nanga en futuboi (2 Kow. 6:17-23). Srefi na ini a muilek situwâsi disi Elisa sori taki a ben abi wan tranga bribi èn taki a ben e frutrow dorodoro na tapu Yehovah.

Meki wi frutrow na tapu Yehovah Gado neleki Elisa (Odo 3:5, 6). Efu wi e du dati, dan „Gado srefi o du bun gi wi èn a o blesi wi” (Ps. 67:1). A tru taki fetiwagi nanga asi di de leki faya no de na wi lontu. Ma na a ten fu a „bigi banawtu” Yehovah o kibri en pipel na heri grontapu (Mat. 24:21; Openb. 7:9, 14). Ma nownow kaba wi musu hori na prakseri taki „Gado na wi kibripe”.—Ps. 62:8.

WAN TU KRUTU-AFERSI DI WI WINI NO SO LANGA PASA

243

Disi na a nomru fu krutu-afersi na heri grontapu di Yehovah Kotoigi **wini na grankrutu** teleki now



Fransikondre pai \$8.2 milyun

Na tapu 11 december 2012 **Fransikondre pai Yehovah Kotoigi a moni disi baka (na ini Amerkan dala)**, baka wan krutu-afersi di teki 15 yari langa



A Hei Krutubangi fu Grikikondre

Na tapu 2 november 2012, a **Hei Krutubangi fu Grikikondre** bosroiti taki Yehovah Kotoigi, wan Kresten bribi di sma sabi na heri grontapu, abi a reti fu abi den eigi konmakandra presi pe den kan anbegi Gado



20

Disi na a nomru fu krutu-afersi di Yehovah Kotoigi wini na a Krutubangi fu Europa di e feti gi den reti fu libisma, sensi april 2000



Zuid-Korea — Bosroiti fu a Komte fu Verenigde Naties di e feti gi den reti fu libisma

25 oktober 2012 - Zuid-Korea de fruplekti fu pai 388 Yehovah Kotoigi di den strafu fu di a konsensi fu den Kotoigi disi e tapu den fu du srudatiwroko

A kownu ben breiti srefisrefi!

NA INI augustus 1936 Robert nanga George Nisbet ben de na ini Swaziland Royal Kraal, a dorpu fu Kownu Sobhuza II. Den ben abi wan wagi nanga bigi boks di den ben gebroiki fu prei wan tu plaat di ben abi poku na tapu èn wan tu lezing fu Brada J. F. Rutherford. A kownu ben breiti srefisrefi! George taki: „Di a kownu taigi wi taki a ben wani bai den plaat, a sani fu prei den plaat, nanga den boks di wi ben e gebroiki fu prei a Kownukondre boskopu, wi ben e syensyen fu taigi en taki a no kan.”

Ma nanga ala lespeki Robert taigi en taki den sani disi no e seri. A taigi en taki den sani ben de fu wan tra sma. Ne a kownu ben wani sabi suma na a sma dati.

Robert taigi en: „Ala den sani disi na fu wan tra Kownu.” Kownu Sobhuza ben wani sabi suma na a Kownu dati. Robert taki: „A Kownu dati na Yesus Krestes, Kownu fu Gado Kownukondre.”

Nanga bigi lespeki Kownu Sobhuza taki: „O, dati na wan bigi Kownu. Mi no wani teki nowan sani di de fu en.”

Robert skrifi: ‘Mi ben lobi a fasi fa a prenspari granman disi Kownu Sobhuza de. A ben e taki Ingrisitongo heri bun, a no ben e prei kefalek èn a no ben abi bigifasi. A ben e taki krin fa a e denki èn sma ben man taki nanga en makriki. Mi ben sidon nanga en na ini en kantoro sowan 45 miniti di George ben e prei a poku na dorosei.’

Robert taki moro fara: ‘A srefi dei dati wi go na a skoro di nen The Swazi National School pe wan moi sani pasa. Wi preiki gi a driktoro di ben lobi a boskopu fu wi. Wi taigi en taki wi ben abi wan sani di e prei poku nanga lezing èn wi ben wani prei den gi a heri skoro. A driktoro ben breiti srefisrefi èn a taigi sowan hondro pikin fu go sidon na tapu a grasi fu arki. Wi ben yere taki den ben e leri den boi na a skoro dati fu prani gron, fu temre, fu bow oso, fu taki Ingrisitongo, èn fu teri. Den meisje ben e leri fu wroko leki ati-oso zuster èn den ben e leri du osowroko nanga tra sani di den ben kan du na ini den aladei libi. Bakaten wi yere taki na a granmama fu Kownu Sobhuza ben seti a skoro disi.’

Sensi 1933 Kownu Sobhuza ben lobi arki den pionier di ben e kon na a dorpu fu en. Wan leisi a ben kari sowan 100 waktiman



Wan fowtow fu Kownu Sobhuza II di Robert Nisbet teki na ini 1936 en di a gi na a Watch Tower Society



(Na tapusei) Den skoropikin di ben arki wan lezing na ini Swasikondre na ini 1936
(Na reti-anusei) George Nisbet nanga en wagi di ben abi bigi boksu

fu en fu arki wan tu plaat di ben abi a Kownukondre boskopu na tapu. A ben gi en nen fu kisi den tijdschrift doronomo èn a ben e teki den tra buku fu wi tu. A no teki langa fosi a kownu ben abi pikin-moro ala buku fu wi! Na a ten fu a Di Fu Tu Gron-tapufeti Ingrisikondre ben tapu a wroko fu Kotoigi na den presi pe den ben e tiri. Ma di dati pasa na ini Swasikondre, Kownu Sobhuza kibri ala den buku fu wi di a ben abi.

Kownu Sobhuza II ben lobi te den Kotoigi ben kon na en dorpu na ini Lobamba. A ben e kari den kerki fesiman drape srefi fu kon arki den Bijbel lezing fu den Kotoigi. Wan leisi di Helvie Mashazi, wan Kotoigi fu Swasikondre, ben e hori wan lezing fu Mateyus kapitel 23, wan grupu kerki fesiman dyompo opo nanga atibron, dan den ben pruberi fu meki a saka sidon. Ma a kownu tapu den èn a aksi Brada Mashazi fu go doro nanga en lezing. Boiti dati, a kownu taigi den arkiman taki den ben musu skri fi ala den Bijbeltekst di a brada kari na ini a lezing!

Wan tra leisi baka di wan pionier brada hori wan lezing, fo kerki fesiman di ben de drape taki: „Wi no de kerki fesiman moro, ma Yehovah Kotoigi.”



Dan den aksi a pionier efu a abi wan tu fu den buku di Kownu Sobhuza ben abi.

Sensi den yari baka 1930 teleki a dede na ini 1982, Kownu Sobhuza sori lespeki gi Yehovah Kotoigi èn a no meki sma frufolgu den di den no ben wani hori densrefi na den gwen ti fu den sma fu a kondre. Fu dati ede, den Kotoigi e warderi den sani di a du èn den sari srefisrefi di a dede.

Na a begin fu 2013 moro leki 3000 Kownukondre preikiman ben de na ini Swasikondre. A kondre abi pikinso moro leki wán milyun sma. Sobun, wan Kotoigi de gi ibri 384 sma na ini a kondre dati. Moru leki 260 pionier de na ini 90 gemeente èn 7496 sma ben go na a Memrefesa na ini 2012. A de krin taki furu sma kan tron Kotoigi ete. A no de fu taki dati den Kotoigi ben man du bun wroko sensi den begin preiki na ini Swasikondre na ini den yari baka 1930.—Fu a historia fu wi na ini Zuid-Afrika.



Efu yu wani *A Waktitoren* noso tra publikàsi, dan yu kan download den fu soso na www.jw.org/srn



Yu kan leisi *Bijbel* —Nyun-Grontapuvertaling tu tapu Internet

Go na www.jw.org/srn, noso scan a code disi



w13 08/15-SR
130426